

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**NACRT**

**ZAKON  
O DUGU, ZADUŽIVANJU I GARANCIJAMA U FEDERACIJI BOSNE I HERCEGOVINE**

**Sarajevo, oktobar 2017. godine**

# ZAKON O DUGU, ZADUŽIVANJU I GARANCIJAMA U FEDERACIJI BOSNE I HERCEGOVINE

## POGLAVLJE I. OPĆE ODREDBE

### Član 1. (Predmet zakona)

Ovim Zakonom uređuju se uslovi, način i postupak zaduživanja Federacije Bosne i Hercegovine (u daljem tekstu: Federacija), kantona, gradova, općina, vanbudžetskih fondova, vanbudžetskih korisnika i javnih preduzeća u Federaciji, izdavanje garancija Federacije, kantona, gradova i općina, osiguranje sredstava za servisiranje duga, vođenje evidencija i izvještavanje o dugu i garancijama u Federaciji, te druga pitanja koja se odnose na dug i garancije.

### Član 2. (Definicije)

Termini koji se koriste u ovom Zakonu imaju sljedeća značenja:

- 1) **Akt o preuzimanju finansijske obaveze** je pisani sporazum, ugovor ili drugi finansijski aranžman koji sadrži uslove pod kojima je dužnik dobio sredstva od povjerioca ili odredbe kojima se regulira otplata kredita, kao i drugi finansijski aranžmani u skladu sa ovim Zakonom na osnovu kojih za dužnika nastaju obaveze.
- 2) **Bruto domaći proizvod Federacije Bosne i Hercegovine** (u daljem tekstu: BDP Federacije) je posljednja dostupna vrijednost BDP-a Federacije, po proizvodnom principu i u stalnim cijenama, objavljenog od strane Federalnog zavoda za statistiku.
- 3) **Budžetski rashodi** propisani su zakonom i propisima donesenim na osnovu zakona za poslove, funkcije i programe koji se planiraju u finansijskim planovima budžetskih korisnika, odnosno u budžetu.
- 4) **Deficit proizašao iz gotovinskog toka** je privremeni deficit prouzrokovan razlikom u vremenu prikupljanja budžetskih prihoda i plaćanja budžetskih rashoda i baziran je na budžetu u kojem ukupno planirani budžetski prihodi nisu manji od ukupnih budžetskih rashoda za tu fiskalnu godinu.
- 5) **Direktna garancija** je garancija izdavaoca garancije izdata direktno u korist povjerioca.
- 6) **Direktni unutrašnji dug Federacije** je dug nastao direktno u ime Federacije i isključuje relevantni unutrašnji dug.
- 7) **Direktni vanjski dug Federacije** je dug nastao direktno u ime Federacije i isključuje relevantni vanjski dug Federacije.
- 8) **Državna pomoć** je svaki stvarni ili potencijalni javni rashod ili umanjeno ostvarenje javnog prihoda, postojećeg, planiranog ili potencijalnog, koja može biti dodijeljena ili planirana direktno ili indirektno od davaoca državne pomoći, u bilo kojem obliku, čime se narušava ili postoji opasnost od narušavanja konkurencije na tržištu stavljajući u povoljniji

položaj određene privredne subjekte, proizvodnju ili trgovinu određenih proizvoda, ili pružanje određenih usluga, ako to utječe na ispunjavanje međunarodnih obaveza Bosne i Hercegovine iz ove oblasti.

9) **Državni dug** je dug Bosne i Hercegovine izražen u domaćoj valuti čiji je dužnik Ministarstvo finansija i trezora Bosne i Hercegovine (u daljem tekstu: Ministarstvo finansija i trezora) u ime Bosne i Hercegovine.

10) **Dug** je finansijska obaveza nastala u skladu sa zakonom ili aktom o preuzimanju finansijske obaveze.

11) **Dug Federacije** je vanjski i unutrašnji dug Federacije izražen u domaćoj ili stranoj valuti, po kojem je dužnik direktno ili indirektno Federalno ministarstvo finansija-Federalno ministarstvo financija (u daljem tekstu: Federalno ministarstvo finansija) u ime Federacije, i ne obuhvata dug kantona, gradova i općina. U dug Federacije uključuje se i dug Federacije koji je do sada nastao u skladu sa zakonom koji je bio na snazi u vrijeme zaduženja.

12) **Dug grada i općine** je unutrašnji i vanjski dug grada i općine.

13) **Dug kantona** je unutrašnji i vanjski dug kantona.

14) **Dugoročni dug** je dug koji se otplaćuje u roku dužem od jedne godine od dana zaduženja.

15) **Dužnik** je strana koja primarno ima obavezu izmirenja finansijske obaveze.

16) **Finansijski lizing** je sporazum za lizing kapitalne investicije na određeni vremenski period s tim da na kraju tog perioda kapitalna investicija postaje vlasništvo dužnika kao što je definirano zakonom.

17) **Garancija** je preuzeta finansijska obaveza u vidu jednostrane pisane izjave izdavaoca garancije ili dvostranog sporazuma zaključenog između izdavaoca garancije i korisnika garancije da izdavalac garancije plati dospjelu a neizmirenu obavezu, u slučaju da dužnik, koji ima primarnu obavezu za izvršenje dospjele finansijske obaveze osigurane garancijom, nije izvršio takvu obavezu.

18) **Indirektna garancija** je protugarancija izdata u korist drugog garantora.

19) **Indirektni dug Federacije** je dug Federacije nastao u ime i za račun dužnika i koji dužnik servisira prema Federaciji u skladu sa uslovima definiranim ugovorom.

20) **Javno preduzeće** je pravno lice upisano u sudski registar kao privredno društvo i koje obavlja djelatnost od javnog društvenog interesa (energetika, komunikacije, komunalne djelatnosti, upravljanje javnim dobrima i druge djelatnosti od javnog društvenog interesa) ili pravno lice osnovano posebnim zakonom koje pruža usluge od općeg ekonomskog interesa.

21) **Javni dug Federacije** predstavlja ukupan dug svih institucionalnih jedinica Federacije koje su prema pravilima statističke metodologije Evropske unije razvrstane u sektor opće države, a obuhvata ukupan dug Federacije, vanbudžetskih fondova i vanbudžetskih korisnika Federacije, isključujući dug između ovih subjekata.

22) **Javni dug grada ili općine** predstavlja dug svih institucionalnih jedinica grada ili općine koje su prema pravilima statističke metodologije Evropske unije razvrstane u sektor opće države, a obuhvata ukupan dug grada odnosno općine i vanbudžetskih korisnika grada odnosno općine, isključujući dug između ovih subjekata.

- 23) **Javni dug kantona** predstavlja ukupan dug svih institucionalnih jedinica kantona koje su prema pravilima statističke metodologije Evropske unije razvrstane u sektor opće države, a obuhvata ukupan dug kantona, vanbudžetskih fondova i vanbudžetskih korisnika kantona, isključujući dug između ovih subjekata.
- 24) **Kapitalna investicija** je razvojni projekt, projekt poboljšanja i izgradnje infrastrukture, uključujući pokretnu i nepokretnu imovinu, opremu i konsultantske usluge koje su sastavni dio takvog projekta koji se nalazi u odobrenom budžetu, te ima period amortizacije duži od pet godina.
- 25) **Korisnik garancije** je povjerilac odnosno drugi garantor kojem se, u slučaju neispunjenja dospjele finansijske obaveze od strane dužnika, izdavalac garancije obavezuje da će ispuniti ugovorenu obavezu, ako su ispunjeni uslovi iz garancije.
- 26) **Kratkoročni dug** je dug koji se otplaćuje u roku kraćem od jedne godine od dana zaduženja.
- 27) **Povjerilac** je kreditor, zajmodavac, lizing društvo i investitor u vrijednosne papire dužnika.
- 28) **Period amortizacije kapitalne investicije** je predviđeni vremenski period stvarnog korištenja kapitalne investicije.
- 29) **Prihodi** u smislu ovog zakona podrazumijevaju, bez ograničenja, porezne i neporezne prihode i ostale prihode utvrđene zakonima i drugim propisima.
- 30) **Princip krajnjeg korisnika** alocira obaveze Federacije o izvršenju otplate vanjskog duga na osnovu mjesta korištenja kreditnih sredstava u vrijeme kada je taj dug nastao.
- 31) **Privredni subjekti u poteškoćama** su oni koji nisu u stanju da, bilo svojim vlastitim sredstvima ili sredstvima koja mogu dobiti od svojih vlasnika (dioničara) ili povjerilaca zaustave gubitke, što bi bez intervencije javnih organa, u kratkom ili srednjem roku, gotovo sigurno rezultiralo prestankom njihovog poslovanja.
- 32) **Radni dan** je dan koji nije subota, nedjelja, praznik kao i dani kada su bankarske institucije, u skladu sa zakonom, ovlaštene da ne rade.
- 33) **Redovni prihodi** podrazumijevaju prihode koji ne uključuju transfere viših nivoa vlasti, prihode od domaćih i stranih pomoći i donacija, primitke iz zaduživanja, prihode iz posebnih ugovora: sufinansiranje građana za jedinicu lokalne zajednice , te druge jednokratne prihode koji se neće kontinuirano realizirati u budućim periodima.
- 34) **Relevantni dug Federacije** je dug Federacije u čije ime se zadužila Bosna i Hercegovina i koji je plativ iz sredstava koje osigurava Federacija.
- 35) **Relevantni dug kantona** je dug kantona u čije ime se zadužila Federacija i koji je plativ iz sredstava koje osigurava kanton.
- 36) **Relevantni dug grada ili općine** je dug grada ili općine u čije ime se zadužila Federacija ili kanton i koji je plativ iz sredstava koje osigurava grad ili općina.
- 37) **Servisiranje duga** je uplata sredstava svake fiskalne godine za glavnicu, kamatu, diskont i druge obaveze na osnovu duga uključujući ostale prateće troškove.
- 38) **Stalno izdvajanje namjenskih sredstava** je ovlaštenje u budžetu i zakonu odnosno odluci o izvršenju budžeta za tekuću godinu koje daje nadležno zakonodavno ili predstavničko tijelo radi izdvajanja namjenskih sredstava u konkretnu svrhu.

39) **Ukupan dug vanbudžetskog fonda zdravstvenog osiguranja** predstavlja dug vanbudžetskog fonda zdravstvenog osiguranja i svih javnih zdravstvenih ustanova koje pružaju usluge zdravstvene zaštite za osigurane osobe prijavljene na osiguranje kod tog fonda zdravstvenog osiguranja.

40) **Ukupan javni dug Federacije** predstavlja ukupan dug svih institucionalnih jedinica u Federaciji koje su prema pravilima statističke metodologije Evropske unije razvrstane u sektor opće države, a obuhvata ukupan dug Federacije, kantona, gradova i općina, vanbudžetskih fondova i vanbudžetskih korisnika, isključujući dug između ovih subjekata.

41) **Unutrašnja garancija** je garancija kojom se garantuje otplata unutrašnjeg duga dužnika.

42) **Unutrašnji dug Federacije, kantona, grada i općine** je dug Federacije, kantona grada i općine izuzimajući njihov vanjski dug.

43) **Vanbudžetski fond** je pravno lice, osnovano na osnovu zakona, koje se finansira iz namjenskih doprinosa i drugih prihoda. Vanbudžetskim fondovima u smislu ovog Zakona smatraju se fondovi socijalne sigurnosti: Federalni zavod za penzijsko i invalidsko osiguranje, Federalni zavod za zapošljavanje, Zavod zdravstvenog osiguranja i reosiguranja Federacije BiH, kantonalni zavodi zdravstvenog osiguranja, kantonalne službe za zapošljavanje i dr.

44) **Vanbudžetski korisnik** u smislu ovog Zakona je privredno društvo, organizacija, ustanova ili drugo pravno lice u kojem Federacija, kanton, grad ili općina ima odlučujući utjecaj na upravljanje i koje je prema pravilima statističke metodologije Evropske unije razvrstano u sektor opće države, a nije budžetski korisnik.

45) **Vanjska garancija** predstavlja garanciju kojom se garantuje otplata vanjskog duga dužnika.

46) **Vanjski dug Federacije** čini direktni i relevantni vanjski dug Federacije nastao u skladu sa ovim Zakonom i zakonom koji je bio na snazi u vrijeme nastanka takvog duga.

47) **Vrijednosni papiri Federacije, kantona, gradova, općina, vanbudžetskih korisnika i javnih preduzeća** su prenosive isprave u nematerijalizovanom obliku-elektronski zapisi na osnovu kojih se ostvaruju prava prema emitentu i čine obavezu emitenta u skladu sa zakonom i odlukom o emisiji vrijednosnih papira.

48) **Zaduživanje** je stvaranje finansijske obaveze po osnovu ugovora o kreditu, finansijskog lizinga i izdavanja vrijednosnih papira.

## **POGLAVLJE II. DUG I ZADUŽIVANJE**

### **Odjeljak A. Status, kategorije i instrumenti osiguranja duga**

#### **Član 3. (Dug kao apsolutna obaveza)**

(1) Dug Federacije predstavlja apsolutnu i bezuslovnu obavezu Federacije u skladu sa uslovima definiranim ugovorom o kreditu, zajmu, finansijskom lizingu i propisima o emisiji vrijednosnih papira, te zakonom i drugim aktom kojim je Federacija preuzela dug drugog pravnog lica kao svoj javni dug.

(2) Dug kantona predstavlja apsolutnu i bezuslovnu obavezu kantona u skladu sa uslovima definiranim ugovorom o kreditu, zajmu, finansijskom lizingu i propisima o emisiji vrijednosnih

papira, te zakonom ili drugim aktom kojim je kanton preuzeo dug drugog pravnog lica kao svoj javni dug.

(3) Dug grada odnosno općine predstavlja apsolutnu i безусловnu obavezu grada ili općine u skladu sa uslovima definiranim ugovorom o kreditu, zajmu, finansijskom lizingu i propisima o emisiji vrijednosnih papira, te drugim aktom kojim je grad odnosno općina preuzela dug drugog pravnog lica kao svoj javni dug.

(4) Dug vanbudžetskog korisnika i javnog preduzeća predstavlja apsolutnu i безусловnu obavezu vanbudžetskog korisnika i javnog preduzeća u skladu sa uslovima definiranim ugovorom o kreditu, zajmu, finansijskom lizingu i propisima o emisiji vrijednosnih papira.

(5) Dug vanbudžetskog fonda predstavlja apsolutnu i безусловnu obavezu vanbudžetskog fonda u skladu sa uslovima definiranim ugovorom o kreditu, zajmu i finansijskom lizingu.

#### **Član 4. (Državni dug)**

(1) Državni dug obuhvaća i dug Bosne i Hercegovine koji je nastao u skladu sa zakonom koji je bio na snazi u vrijeme zaduženja.

(2) U svrhu utvrđivanja državnog duga, kada je neizmirena obaveza izražena u zakonskoj valuti, izuzimajući domaću valutu, vrijednost će se preračunati u domaću valutu u vrijeme vršenja procjene, prema zvaničnom kursu Centralne banke Bosne i Hercegovine (u daljem tekstu: Centralna banka).

#### **Član 5. (Status otplate duga)**

(1) Sve obaveze koje čine unutrašnji i vanjski dug Federacije imaju jednak status, bez obzira na to kada su nastale i da li su nastale izdavanjem vrijednosnih papira, uzimanjem kredita, zajmova, finansijskog lizinga ili preuzimanjem duga.

(2) Otplata glavnice duga i plaćanje kamata na taj dug su prioritarna obaveza Federacije, bez obzira na izvore prihoda i da li su položena na račun u komercijalnoj banci ili na račun kod Centralne banke i ne podliježu, sada ili kasnije, bilo kojem drugom potraživanju.

(3) Odredbe stava (1) i (2) ovog člana na odgovarajući način se primjenjuju na kantone, gradove i općine.

#### **Član 6. (Instrumenti osiguranja duga)**

(1) Na zahtjev povjerioca dug Federacije se može dodatno osigurati:

- a) Mjenicom,
- b) Cjelokupnim ili dijelom prihoda koji se očekuje od kapitalne investicije,
- c) Garancijom banke i društva za finansijsko osiguranje i garancijom Bosne i Hercegovine.

(2) Na zahtjev povjerioca dug kantona, grada i općine se može dodatno osigurati:

- a) Mjenicom,
- b) Namjenskim novčanim depozitom do visine godišnjeg anuiteta,
- c) Cjelokupnim ili dijelom prihoda koji se očekuje od kapitalne investicije,
- d) Prihodima od indirektnih poreza koji pripadaju kantonu, gradu i općini,
- e) Garancijom banke i društva za finansijsko osiguranje, garancijom Bosne i Hercegovine i Federacije, a dug grada i općine i garancijom kantona.

(3) U slučaju da se na zahtjev povjerioca otplata duga dodatno osigurava instrumentima osiguranja iz st. (1) i (2) ovog člana odlukom o zaduženju utvrđuje se i ovlaštenje za davanje instrumenata iz stava (1) tač. a) i b) i iz stava (2) tač. a), b), c) i d) ovog člana.

### **Član 7. (Ništavnost duga i instrumenata osiguranja)**

(1) Zaduzenje koje nastane nakon stupanja na snagu ovog Zakona, a nije nastalo na način i pod uslovima propisanim ovim Zakonom neće biti važeća i provodiva obaveza Federacije, kantona, grada, općine, vanbudžetskog fonda, vanbudžetskog korisnika i javnog preduzeća.

(2) Odredbe ugovora o kreditu, zajmu i finansijskom lizingu zaključeni suprotno odredbama ovog Zakona su ništavne.

(3) Bilo koji instrument osiguranja koji se izdaje povjeriocu u svrhu osiguranja otplate duga Federacije, kantona, grada i općine suprotno ovlaštenjima iz člana 6. stav (3) ovog Zakona je ništavan.

## **Odjeljak B. Način zaduživanja, ovlaštenja i godišnja ograničenja novog zaduživanja**

### **Član 8. (Mjesto i valuta zaduživanja)**

(1) Federacija, kanton, grad, općina, vanbudžetski korisnik i javno preduzeće se mogu zaduživati u zemlji i inostranstvu, u domaćoj i stranoj valuti.

(2) Vanbudžetski fond se može zaduživati jedino u zemlji, u domaćoj valuti.

### **Član 9. (Forma zaduživanja)**

(1) Federacija kanton, grad, općina, vanbudžetski korisnik i javno preduzeće mogu se zaduživati uzimanjem kredita, zajmova, finansijskog lizinga i izdavanjem vrijednosnih papira.

(2) Vanbudžetski fond se može zaduživati uzimanjem kredita, zajmova i finansijskog lizinga.

### **Član 10. (Ročnost duga)**

(1) Federacija kanton, grad i općina se mogu zaduživati kratkoročno i dugoročno.

(2) Izuzetno od stava (1) ovog člana, zaduživanje u svrhe iz člana 20. stav (1) tačka a) ovog Zakona moguće je samo u okviru kratkoročnog zaduživanja.

(3) Vanbudžetski korisnik i javno preduzeće se mogu zaduživati kratkoročno i dugoročno.

(4) Vanbudžetski fond se može zaduživati kratkoročno i dugoročno samo u obimu koji je dopušten propisima kojima se uređuje njegovo poslovanje.

### **Član 11. (Kratkoročno zaduživanje za finansiranje budžetskog deficita proizašlog iz gotovinskog toka)**

(1) Kratkoročni dug nastao radi finansiranja budžetskog deficita proizašlog iz gotovinskog toka mora se otplatiti u fiskalnoj godini u kojoj je zaduženje i nastalo, te ni u kom vremenskom periodu tokom te fiskalne godine ne smije preći 15% redovnih prihoda budžeta ostvarenih u prethodnoj fiskalnoj godini.

(2) Kratkoročni dug nastao radi finansiranja budžetskog deficita proizašlog iz gotovinskog toka neće se smatrati neizmirenim i neće ulaziti u svrhe utvrđivanja ograničenja za zaduživanje i izdavanje garancija.

#### **Član 12.**

##### **(Ovlaštenja za provođenje procedura zaduživanja Federacije, kantona, grada odnosno općine)**

U skladu sa odredbama ovog Zakona, Federalno ministarstvo finansija, kantonalno ministarstvo finansija, služba za finansije grada odnosno općine, imaju isključivo ovlaštenje za provođenje procedura za:

- a) zaključivanje ugovora o kreditu, zajmu i finansijskom lizingu;
- b) izdavanje vrijednosnih papira;
- c) izdavanje garancija.

#### **Član 13.**

##### **(Godišnje ograničenje iznosa novog zaduživanja Federacije, kantona, grada i općine)**

(1) Ograničenje iznosa i svrha novog unutrašnjeg i vanjskog zaduživanja Federacije i kantona određuje se budžetom i zakonom o izvršenju budžeta, a grada i općine budžetom i odlukom o izvršenju budžeta.

(2) U periodu privremenog finansiranja Federacija, kanton, grad i općina se mogu zadužiti po osnovu unutrašnjeg i vanjskog duga do iznosa utvrđenog u odluci o privremenom finansiranju.

(3) U slučaju da se vrijednosni papiri emitiraju sa popustom, ograničenje se obračunava po nominalnoj vrijednosti emitiranih vrijednosnih papira.

#### **Član 14.**

##### **(Godišnje ograničenje zaduživanja vanbudžetskog korisnika)**

(1) Finansijskim planom vanbudžetskog korisnika Federacije određuje se visina i svrha novog unutrašnjeg i vanjskog zaduženja u toku fiskalne godine.

(2) Zakonom o izvršenju budžeta Federacije Bosne i Hercegovine (u daljem tekstu: Zakon o izvršenju budžeta Federacije) određuje se ukupna visina zaduženja iskazana u finansijskim planovima svih vanbudžetskih korisnika Federacije, kao i ukupan iznos otplata glavnice duga.

(3) Godišnji iznos zaduženja svih vanbudžetskih korisnika Federacije ne može biti veći od ukupne visine zaduženja određene Zakonom o izvršenju budžeta Federacije.

(4) Odredbe ovog člana na odgovarajući način primjenjuju kantoni, gradovi i općine.

#### **Član 15.**

##### **(Godišnje ograničenje zaduživanja vanbudžetskog fonda)**

(1) Finansijskim planom federalnog vanbudžetskog fonda određuje se visina i svrha novog unutrašnjeg zaduženja u toku fiskalne godine



- (2) Zakonom o izvršenju budžeta Federacije određuje se ukupna visina zaduženja iskazana u finansijskim planovima svih federalnih vanbudžetskih fondova, kao i ukupan iznos otplate glavnice duga.
- (3) Godišnji iznos zaduženja svih vanbudžetskih fondova ne može biti veći od ukupne visine zaduženja određene Zakonom o izvršenju budžeta Federacije.
- (4) Odredbe ovog člana na odgovarajući način primjenjuju kantoni, gradovi i općine.

**Član 16.**  
**(Ograničenje zaduživanja javne zdravstvene ustanove)**

- (1) Javnoj zdravstvenoj ustanovi nije dozvoljeno zaduživanje, odnosno stvaranje unutrašnjeg ili vanjskog duga.
- (2) U slučaju kolizije ovog Zakona i drugih zakona iz ove oblasti primjenjuju se odredbe ovog Zakona.
- (3) Zakonom o izvršenju budžeta Federacije određuje se ukupan iznos otplate glavnice postojećeg duga iskazan finansijskim planovima svih javnih zdravstvenih ustanova čiji je osnivač Federacija i na čije finansijske planove nadležni organ Federacije daje saglasnost.

**Odjeljak C. Prethodna saglasnost za zaduživanje i izdavanje garancije**

**Član 17.**  
**(Prethodna saglasnost Federalnog ministarstva finansija)**

- (1) U skladu sa odredbama ovog Zakona bez prethodne pisane saglasnosti Federalnog ministarstva finansija ne mogu se zaduživati:
  - a) kantoni, gradovi i općine
  - b) federalni vanbudžetski fondovi i vanbudžetski korisnici
  - c) federalna javna preduzeća koja su u posljednje dvije godine zaredom ostvarila negativan finansijski rezultat
  - d) pravna lica koja imaju neotplaćen dug za koji je izdata garancija Federacije.
- (2) Na prijedlog Federalnog ministarstva finansija Vlada Federacije Bosne i Hercegovine (u daljem tekstu: Vlada Federacije) utvrđuje i u „Službenim novinama Federacije BiH“ objavljuje listu subjekata iz stava (1) tač. b), c) i d) ovog člana .
- (3) Lista iz stava (2) ovog člana se usklađuje pri svakoj promjeni. U slučaju promjena, lista subjekata iz stava (1) tač. b) i c) ovog člana, usklađuje se na prijedlog nadležnog ministarstva, a lista subjekata iz stava (1) tačka d) ovog člana na prijedlog Federalnog ministarstva finansija.
- (4) Bez prethodne pisane saglasnosti Federalnog ministarstva finansija
  - a) kantoni, gradovi i općine ne mogu izdavati garancije
  - b) kantoni ne mogu davati prethodnu saglasnost za zaduživanje kantonalnim vanbudžetskim fondovima i vanbudžetskim korisnicima
  - c) gradonačelnik odnosno načelnik ne može davati prethodnu saglasnost za zaduživanje vanbudžetskim korisnicima grada odnosno općine

(5) Federalno ministarstvo finansija donijet će propise kojima se uređuje postupak za davanje prethodne pisane saglasnosti iz st. (1) i (4) ovog člana, te obrazac i potrebnu dokumentaciju.

### **Član 18.** **(Prethodna saglasnost ministarstva finansija kantona)**

(1) U skladu sa odredbama ovog Zakona bez prethodne pisane saglasnosti ministarstva finansija kantona ne mogu se zaduživati:

- a) kantonalni vanbudžetski fondovi i vanbudžetski korisnici,
- b) kantonalna javna preduzeća koja su u posljednje dvije godine zaredom ostvarile negativan finansijski rezultat,
- c) pravna lica koja imaju neotplaćen dug za koji je izdata garancija kantona

(2) Vlada kantona, na prijedlog ministarstva finansija kantona utvrđuje i u službenim novinama kantona objavljuje listu subjekata iz stava (1) tač. a), b) i c) ovog člana.

(3) Lista iz stava (2) ovog člana se usklađuje pri svakoj promjeni. U slučaju promjena, lista subjekata iz stava (1) tač. a) i b) ovog člana, usklađuje se na prijedlog nadležnog ministarstva kantona, a lista subjekata iz stava (1) tačke c) ovog člana na prijedlog ministarstva finansija kantona.

(4) Ministarstvo finansija kantona donijet će propise kojima se uređuje postupak za izdavanje prethodne saglasnosti iz stava (1) ovog člana, te obrazac i potrebnu dokumentaciju.

### **Član 19.** **(Prethodna saglasnost grada i općine)**

(1) U skladu sa odredbama ovog Zakona bez prethodne pisane saglasnosti gradonačelnika odnosno načelnika ne mogu se zaduživati:

- a) vanbudžetski korisnici grada odnosno općine,
- b) javna preduzeća grada ili općine koja su u posljednje dvije godine zaredom ostvarile negativan finansijski rezultat
- c) pravna lica koja imaju neotplaćen dug za koji je izdata garancija grada ili općine.

(2) Gradonačelnik i načelnik, na prijedlog gradske odnosno općinske službe za finansije utvrđuje i u službenim novinama općine objavljuje listu subjekata iz stava (1) tačke a), b) i c) ovog člana.

(3) Lista iz stava (2) ovog člana se usklađuje pri svakoj promjeni.

(4) Gradonačelnik i načelnik donijet će propise kojima se uređuje postupak za izdavanje prethodne saglasnosti iz stava (1) ovog člana, te obrazac i potrebnu dokumentaciju.

## **Odjeljak D. Svrha i postupak unutrašnjeg zaduživanja**

### **Član 20.** **(Svrha unutrašnjeg zaduživanja)**

(1) Federacija, kanton, grad i općina se mogu zaduživati po osnovu unutrašnjeg duga u sljedeće svrhe:

- a) Finansiranja budžetskog deficita proizašlog iz gotovinskog toka
- b) Finansiranja budžetskog deficita
- c) Finansiranja razvojnih programa i kapitalnih investicija odobrenih programom javnih investicija
- d) Plaćanje troškova servisiranja duga, uključujući i povezane troškove
- e) Plaćanja aktiviranih garancija u potpunosti ili djelimično
- f) Finansiranja uspostavljanja i održavanja rezervi likvidnosti
- g) Prijevremena otplate duga ili otkupa izdatih dužničkih vrijednosnih papira
- h) Restrukturiranja nedospjelog duga
- i) Finansiranja posebnih programa odobrenih od strane nadležnog zakonodavnog ili predstavničkog tijela

(2) Vanbudžetski fond, vanbudžetski korisnik i javno preduzeće se može zaduživati samo u svrhe koje su dopuštene propisima koji uređuju njihovo poslovanje.

### **Član 21.**

#### **(Postupak unutrašnjeg zaduživanja Federacije, kantona, grada i općine)**

(1) Odredbe propisa iz člana 13. stav (1) ovog Zakona su opća ovlaštenja za zaduživanje tokom fiskalne godine na osnovu unutrašnjeg duga do propisanog iznosa koje se provodi u skladu sa ovim Zakonom.

(2) U skladu sa odredbama propisa iz člana 13. stav (1) ovog Zakona Vlada Federacije, vlada kantona, gradonačelnik, odnosno načelnik donosi posebnu odluku o zaduženju kojom se utvrđuje visina i svrha zaduženja, forma i uslovi zaduženja, rok dospijeca, ovlaštenja za davanje instrumenata osiguranja, te drugi relevantni elementi.

(3) Zaduzenje u skladu sa odlukom iz stava (2) ovog člana može se provesti u jednoj ili u više tranši.

(4) Federalni ministar finansija, ministar finansija kantona, gradonačelnik odnosno načelnik su ovlašteni da provedu odluku iz stava (2) ovog člana.

### **Član 22.**

#### **(Relevantni unutrašnji dug Federacije)**

(1) U slučaju da unutrašnje zaduzenje Federacije nastaje u vidu vrijednosnih papira Bosne i Hercegovine, Federalno ministarstvo finansija će se konsultovati sa Ministarstvom finansija i trezora u vezi sa emisijom vrijednosnih papira Bosne i Hercegovine.

(2) U slučaju relevantnog unutrašnjeg zaduzenja Federacije iz stava (1) ovog člana Federalno ministarstvo finansija podnosi zahtjev Ministarstvu finansija i trezora za stvaranje obaveza na osnovu indirektnog duga Bosne i Hercegovine u korist Federacije.

(3) Zahtjev iz stava (2) ovog člana sadrži neopozivo uputstvo Ministarstvu finansija i trezora da emitira vrijednosne papire Bosne i Hercegovine u skladu sa uslovima definiranim odlukom iz člana 21. stav (2) ovog Zakona.

(4) Nakon odobrenja za stvaranje indirektnog duga Bosne i Hercegovine, Federalno ministarstvo finansija dužno je zaključiti ugovor sa Ministarstvom finansija i trezora kojim se uređuju međusobna prava i obaveze, uključujući i obavezu Federacije da Bosni i Hercegovini plati svoj relevantni unutrašnji dug.

### **Član 23.**

#### **(Emisija vrijednosnih papira Federacije, kantona, gradova i općina)**

- (1) Vlada Federacije je ovlaštena donijeti propise kojima se uređuju uslovi i pravila emisije vrijednosnih papira Federacije.
- (2) Kada unutrašnje zaduženje Federacije nastaje u vidu vrijednosnih papira Federacije, zaduženje se provodi u skladu sa propisima koji uređuju tržište vrijednosnih papira u Federaciji i propisom Vlade Federacije iz stava (1) ovog člana.
- (3) Odredbe ovog člana na odgovarajući način primjenjuju kantoni, gradovi i općine.

#### **Član 24.**

#### **(Postupak unutrašnjeg zaduživanja vanbudžetskog fonda, vanbužetskog korisnika i javnog preduzeća)**

U granicama i ovlaštenjima iz ovog Zakona, provođenje postupka zaduživanja vanbudžetskog fonda, vandžetskog korisnika i javnog preduzeća provodi se u skladu sa propisima koji uređuju njihovo poslovanje.

### **Odjeljak E. Svrha i postupak vanjskog zaduživanja**

#### **Član 25.**

#### **(Svrha vanjskog zaduživanja)**

- (1) Federacija, kanton, grad i općina se mogu zaduživati po osnovu vanjskog duga u sljedeće svrhe:
  - a) Finansiranja budžetskog deficita;
  - b) Finansiranja razvojnih programa i kapitalnih investicija odobrenih programom javnih investicija;
  - c) Plaćanje troškova servisiranja duga, uključujući i povezane troškove;
  - d) Plaćanja aktiviranih garancija u potpunosti ili djelimično;
  - e) Finansiranja uspostavljanja i održavanja rezervi likvidnosti;
  - f) Prijevremene otplate duga ili otkupa izdatih dužničkih vrijednosnih papira;
  - g) Restrukturiranja nedospjelog duga;
  - h) Finansiranja posebnih programa odobrenih od strane nadležnog zakonodavnog i predstavničkog tijela.

- (2) Vanbudžetski korisnik i javno preduzeće mogu, u skladu sa odredbama ovog Zakona, stvoriti obaveze po osnovu vanjskog duga samo u svrhe koje su dopuštene propisima koji uređuju njihovo poslovanje.

#### **Član 26.**

#### **(Provedba vanjskog zaduživanja)**

Vanjsko zaduživanje Federacije, kantona, grada, općine, vanbudžetskog korisnika i javnog preduzeća provodi se u skladu sa odredbama ovog Zakona i propisima Bosne i Hercegovine koji uređuju dug, zaduživanje i garancije.

#### **Član 27.**

#### **(Postupak vanjskog zaduživanja Federacije)**

- (1) Inicijativa za stvaranje vanjskog duga pokreće se zahtjevom koji se podnosi Federalnom ministarstvu finansija na obrascu uz koji se dostavlja propisana dokumentacija.

- (2) Na prijedlog Federalnog ministarstva finansija, Vlada Federacije utvrđuje osnove za pregovore i određuje delegaciju za pregovore koja usaglašava prijedlog kreditnog sporazuma i drugih dokumenata koji iz njega proizlaze.
- (3) U slučaju stvaranja relevantnog vanjskog duga Federacije Federalno ministarstvo finansija dostavlja Ministarstvu finansija i trezora zahtjev kojim pokreće inicijativu za stvaranje vanjskog državnog duga.
- (4) Federalno ministarstvo finansija je odgovorno za vođenje pregovora.
- (5) Nakon završenih pregovora Vlada Federacije, na osnovu usaglašenog prijedloga kreditnog sporazuma i zapisnika sa pregovora, Parlamentu Federacije Bosne i Hercegovine (u daljem tekstu: Parlament Federacije) predlaže donošenje odluke o zaduživanju.
- (6) Odluka iz stava (4) ovog člana sadrži:
- a) svrhu, odnosno namjenu zaduženja;
  - b) formu, valutu i visinu zaduženja;
  - c) uslove zaduživanja;
  - d) okvirni iznos sredstava i način osiguranja istih u slučaju da je potrebno osigurati sufinansiranje;
  - e) ovlaštenja za izdavanje instrumenata osiguranja i potpisivanje odgovarajućih kreditnih ugovora.
- (7) Odluku o zaduženju donosi Parlament Federacije.
- (8) U slučaju indirektnog duga, odnosno kada je finansijska obaveza na osnovu vanjskog duga Federacije alocirana na kanton, općinu, grad, vanbudžetskog korisnika ili javno preduzeće, Federalno ministarstvo finansija pripremit će prijedlog podugovora kojim prenosi prava i obaveze na kanton, općinu, grad, vanbudžetskog korisnika ili javno preduzeće.
- (9) U slučaju izmjena postojećih finansijskih obaveza provodi se procedura iz st. (1) do (6) ovog člana.
- (10) Odredbe ovog člana na odgovarajući način primjenjuju kantoni, gradovi, općine, vanbudžetski korisnici i javna preduzeća.

### **Član 28.**

#### **(Postupak direktnog vanjskog zaduživanja kantona, grada, općine i javnog preduzeća)**

- (1) U slučaju direktnog vanjskog zaduživanja kantona, grada, općine, vanbudžetskog korisnika i javnog preduzeća zahtjev sa pratećom dokumentacijom se podnosi Federalnom ministarstvu finansija.
- (2) Na prijedlog Federalnog ministarstva finansija, Vlada Federacija utvrđuje prijedlog odluke o davanju saglasnosti za direktno zaduženje iz stava (1) ovog člana.
- (3) Odluka iz stava (2) ovog člana sadrži:
- a) svrhu, odnosno namjenu zaduženja;
  - b) formu, valutu i visinu zaduženja;
  - c) uslove zaduživanja;
  - d) okvirni iznos sredstava i način osiguranja istih u slučaju da je potrebno osigurati sufinansiranje;
- (4) Odluku o davanju saglasnosti za direktno zaduženje donosi Parlament Federacije.

- (5) Odluku o direktnom zaduženju donosi nadležni organ dužnika iz stava (1) ovog člana.
- (6) U slučaju izmjena postojećih kreditnih sporazuma provodi se procedura iz st. (1) do (5) ovog člana.

## **Odjeljak F. Raspolaganje kreditnim sredstvima**

### **Član 29. (Namjenski projektni računi)**

- (1) Federalno ministarstvo finansija je ovlašteno da otvori namjenske projektne račune za deponiranje kreditnih sredstava odobrenih Federaciji, ako ugovorom o kreditu ili propisima Bosne i Hercegovine nije drugačije određeno.
- (2) Kreditna sredstva iz stava (1) ovog člana koriste se u svrhu za koju su odobrena, a u skladu sa ugovorom o kreditu.
- (3) Vlada Federacije donosi propis kojim se propisuje način i postupak korištenja kreditnih sredstava odobrenih Federaciji.
- (4) U slučaju direktnog vanjskog duga kantona, grada, općine, vanbudžetskog korisnika i javnog preduzeća, odobrenim kreditnim sredstvima raspolaže se na način i pod uslovima utvrđenim ugovorom o kreditu.

### **Član 30. (Investiranje kreditnih sredstava)**

- (1) Ako ugovorom o kreditu ili propisima Bosne i Hercegovine nije drugačije određeno Federalno ministarstvo finansija je ovlašteno da sredstva odobrenih kredita Federaciji investira samo u svrhe propisane zakonom koji uređuje investiranje javnih sredstava.
- (2) Kamate ostvarene investiranjem raspoloživih sredstava predstavljaju prihod budžeta Federacije i uplaćuju se na Jedinostveni račun Trezora budžeta Federacije Bosne i Hercegovine (u daljem tekstu: Jedinostveni račun Trezora Federacije).

## **POGLAVLJE III. SERVISIRANJE DUGA**

### **Odjeljak A. Alokacija obaveze otplate vanjskog državnog duga**

#### **Član 31. (Alokacija vanjskog državnog duga)**

- (1) Alokacija vanjskog državnog duga nastalog prije stupanja na snagu ovog Zakona, a koja nije konačna, alocirat će se po principu krajnjeg korisnika. U slučaju da princip krajnjeg korisnika nije primjenjiv, tada se obaveza otplate duga alocira u skladu sa udjelima alociranog duga Federacije, Republike Srpske i Brčko Distrikta Bosne i Hercegovine u državni budžet u godini u kojoj se alokacija i vrši.
- (2) Federacija, kanton, grad, općina i javno preduzeće obavezni su plaćati svoj pripadajući dio vanjskog duga.
- (3) Alokacija vanjskog duga Federacije, kantona, općine, grada i javnog preduzeća nastalog prije stupanja na snagu ovog Zakona, a koja nije konačna u skladu sa stavom (4) ovog člana, alocirat će se na osnovu principa krajnjeg korisnika.

## **Odjeljak B. Obaveza planiranja sredstava za servisiranje duga Federacije, kantona, grada i općine i rezervne mjere**

### **Član 32. (Obaveza planiranja sredstava)**

- (1) Sredstva potrebna za servisiranje duga Federacije obavezno se planiraju u budžetu, prema dinamici dospjeća tih obaveza.
- (2) Budžetom za tekuću godinu i Zakonom o izvršenju budžeta Federacije propisat će se iznos potreban za servisiranje duga za tekuću fiskalnu godinu.
- (3) Dospjele obaveze za servisiranje duga Federacije u izvršavanju budžeta imaju prioritet plaćanja u odnosu na sve druge rashode i izdatke.
- (4) Odredbe st. (1), (2) i (3) ovog člana na odgovarajući način primjenjuju kantoni, gradovi i općine.

### **Član 33. (Mjere u slučaju kašnjenja servisiranja indirektnog duga Federacije)**

- (1) Dužnik u čije ime se zadužila Federacija dužan je u potpunosti platiti iznos koji je plativ na dan dospjeća po osnovu indirektnog duga Federacije.
- (2) U slučaju kada je izvjesno da dužnik neće biti u mogućnosti na dan dospjeća u potpunosti platiti svoje obaveze po osnovu indirektnog duga Federacije, dužan je obavijestiti Federalno ministarstvo finansija o mogućnosti takvog kašnjenja najkasnije 30 dana prije roka dospjeća duga.
- (3) Obavijest iz stava (2) ovog člana mora sadržavati obrazloženje eventualnog kašnjenja i rok izmirenja tih obaveza.
- (4) U slučaju izuzetnog pogoršanja finansijskog stanja dužnika, Federalno ministarstvo finansija može, na zahtjev dužnika, odobriti reprogram kreditnih obaveza po osnovu indirektnog duga Federacije.
- (5) Uz zahtjev iz stava (4) ovog člana dužnik dostavlja i obrazloženje zahtjeva, plan otplate duga, detaljan plan novčanih tokova za godinu u kojoj se zahtjev podnosi, te druge informacije i dokumentaciju koju Federalno ministarstvo finansija zatraži.
- (6) Reprogram kreditnih obaveza iz stava (4) ovog člana može uključivati ukupan iznos svih dospjelih a neplaćenih glavnica, kamata i drugih troškova kredita, kao i ukupan iznos nedospjelih glavnica kredita koje dospijevaju u periodu koji ne prelazi dvije godine. Rok otplate reprogramiranih obaveza ne može biti duži od sedam godina, a period odgode dvije godine.
- (7) Reprogram kreditnih obaveza iz stava (4) ovog člana može se odobriti samo jedanput u periodu otplate tog duga.
- (8) Na reprogramirane kreditne obaveze iz stava (6) ovog člana dužnik je obavezan plaćati kamatu po stopi koja je za dva procenta više od ugovorene redovne kamate.
- (9) U slučaju odobrenja reprograma kreditnih obaveza sa dužnikom se zaključuje ugovor ili aneks ugovora kojim se preciziraju međusobna prava i obaveze koje iz reprograma proizlaze. Ako dužnik ne obavijesti Federalno ministarstvo finansija ili zakasni izmiriti svoj ugovornu

obavezu na dan dospijeća dužan je, bez potrebe obavještenja od strane Federalnog ministarstva finansija, obračunati i platiti zakonsku zateznu kamatu na zakašnjeli iznos od dana dospijeća do dana stvarnog plaćanja.

#### **Član 34.**

##### **(Dodatne mjere u slučaju kašnjenja servisiranja indirektnog duga Federacije)**

(1) U slučaju da kanton, grad ili općina kasne u izmirenju obaveza po osnovu indirektnog duga Federacije duže od 60 dana od dana dospijeća, Federalno ministarstvo finansija će:

- a) Privremeno obustaviti transfere iz budžeta Federacije prema kantonu, gradu i općini;
- b) Zaplijeniti i zadržati dio prihoda sa Posebnog računa za raspodjelu prihoda od indirektnih poreza sa Jedinstvenog računa koji pripadaju kantonu, gradu odnosno općini;
- c) Aktivirati druge instrumente osiguranja naplate.

(2) Dok se dospjele obaveze kantona, grada i općine prema Federaciji po osnovu indirektnog duga u potpunosti ne izmire Federacija ne može izdavati garanciju niti stvarati indirektni dug u ime kantona, grada i općine, a Federalno ministarstvo finansija ne može izdavati kantonu, gradu i općini saglasnost iz člana 17. ovog Zakona.

(3) Odredbe stava (1) tač. a) i c) i stava (2) ovog člana na odgovarajući način se primjenjuju i na vanbudžetske fondove, vanbudžetske korisnike i javna preduzeća.

#### **Član 35.**

##### **(Rezervne mjere u slučaju kašnjenja servisiranja duga kantona, grada i općine prema drugim povjeriocima)**

(1) U slučaju da kanton, grad i općina kasne u izmirenju obaveza po bilo kojem dugu definiranim ovim Zakonom, osim po osnovu indirektnog duga Federacije, duže od 30 dana od datuma dospijeća, dužni su u roku od pet dana po isteku ovog roka obavijestiti Federalno ministarstvo finansija.

(2) Po prijemu obavijesti iz stava (1) ovog člana Federalno ministarstvo finansija je ovlašteno od kantona, grada ili općine zahtijevati izradu i utvrditi rok za dostavu plana mjera za osiguranje sredstava za servisiranje duga.

(3) Plan mjera iz stava (2) ovog člana podliježe odobrenju povjerioca.

(4) U slučaju da kanton, grad ili općina ne dostavi plan mjera iz stava (2) ovog člana u roku koji odredi Federalno ministarstvo finansija ili ne provodi odobrene mjere, ili je izvjesno da dužnik neće biti u mogućnost platiti dospjele obaveze, a taj dug je osiguran instrumentom iz člana 6. stav (2) tačka d) ovog Zakona, Federalno ministarstvo finansija će, u svrhu urednog servisiranja duga prema povjeriocima, zaplijeniti i zadržati dio prihoda sa Posebnog računa za raspodjelu prihoda od indirektnih poreza sa Jedinstvenog računa koji pripadaju kantonu, gradu odnosno općini.

(5) Zaplijenjena sredstva iz stava (4) ovog člana, Federalno ministarstvo će deponovati na namjenski račun za servis duga dužnika i plativa su povjeriocu u skladu sa uslovima definiranim ugovorom o kreditu, zajmu, lizingu ili odlukom o emisiji vrijednosnih papira.

#### **Član 36.**

##### **(Primjena odredbi)**

Odredbe čl. 33. i 34. ovog Zakona na odgovarajući način primjenjuju kantoni, gradovi i općine.



## **Odjeljak C. Saradnja sa Centralnom bankom**

### **Član 37. (Računi za servisiranje vanjskog duga)**

(1) Federalno ministarstvo finansija ovlašteno je da otvori račune u Centralnoj banci za uredno servisiranje direktnog vanjskog duga Federacije i plaćanje direktnih vanjskih garancija Federacije.

(2) Ministarstvo finansija i trezora ovlašteno je da kod Centralne banke otvori namjenske račune, odnosno podračune u svrhu urednog servisiranja obaveza relevantnog duga Federacije.

### **Član 38. (Agentski ugovor)**

Federalno ministarstvo finansija je ovlašteno da zaključi agentski ugovor sa Centralnom bankom kojim će se utvrditi način i uvjeti u skladu sa kojima će Centralna banka obavljati agentske poslove za Federalno ministarstvo finansija, uključujući, ali ne ograničavajući se na osiguravanje strane valute ili valuta u razmjenu za domaću valutu u iznosima potrebnim da se udovolji zahtjevima za planirano servisiranje direktnog vanjskog duga Federacije.

## **POGLAVLJE IV. GARANCIJE**

### **Odjeljak A. Opis garancija Federacije**

#### **Član 39. (Opće odredbe o garancijama)**

(1) Garancija Federacije može se izdati u skladu sa uslovima definiranim ovim Zakonom i ne može proizaći sama po sebi ili na drugi način biti indirektno izdata.

(2) Garancija Federacije predstavlja potencijalnu obavezu Federacije. Obaveza Federacije nastaje ako dužnik nije izvršio otplatu garantovanog duga uz troškove finansiranja u skladu sa uslovima finansijske obaveze u cijelosti ili djelimično, te ukoliko su ispunjeni ostali uslovi iz garancije.

(3) Obaveza Federacije je da po dospijeću vrši otplatu u skladu sa planom i neće biti odgovorna za bilo kakva prijevremena plaćanja, osim ako je to izričito prihvatila u skladu sa uslovima garancije.

(4) Garancija Federacije se pretvara u dug Federacije kada Federalno ministarstvo finansija utvrdi da plaćanje ili plaćanja koja su dospjela na ime finansijske obaveze na koju se garancija Federacije odnosi nisu izvršena u skladu sa uslovima zaduživanja i da dužnik nije izvršio svoju obavezu.

(5) Pretvaranje garancije u dug Federacije ne podliježe bilo kojem ograničenju duga Federacije iz ovog Zakona.

(6) Odredbe ovog člana na odgovarajući način primjenjuju kantoni, gradovi i općine.

## **Odjeljak B. Izdavaoci i tražioci garancije**

### **Član 40. (Izdavaoci i tražioci garancije)**

- (1) Izdavalac garancije je Federacija, kanton, grad ili općina, nezavisno od osnovnog posla između dužnika i povjerilaca.
- (2) Tražilac garancije je dužnik koji se obavezuje da će otplatiti garantirani dug uz troškove finansiranja u skladu sa uslovima akta o preuzimanju finansijske obaveze.
- (3) Federacija može izdavati garancije kantonima, gradovima, općinama, vanbudžetskim korisnicima, bankama i privrednim subjektima sa sjedištem na području Federacije, u svrhe definirane članom 42. ovog Zakona.
- (4) Kanton može izdavati garancije gradu i općini sa područja kantona, vanbudžetskim korisnicima kantona i privrednim subjektima sa sjedištem na području kantona, u svrhe definirane članom 42. stav (1) ovog Zakona.
- (5) Grad i općina može izdavati garancije vanbudžetskim korisnicima grada odnosno općine i privrednim subjektima sa sjedištem na području grada odnosno općine, u svrhe definirane članom 42. stav (1) ovog Zakona.
- (6) Garancija Federacije, kantona, grada i općine može se izdati samo dužniku, odnosno tražiocu garancije koji ispunjava kriterije podobnosti koje utvrđuje federalni ministar finansija.

### **Član 41. (Vrste garancija)**

- (1) Federacija, kanton, grad i općina mogu izdavati direktne i indirektne, vanjske i unutrašnje garancije za dugoročni dug u obliku zajma, kredita ili obveznica.
- (2) Indirektna garancija Federacije može biti izdata samo u korist Bosne i Hercegovine, a indirektna garancija kantona, grada i općine može biti izdata samo u korist Federacije.

## **Odjeljak C. Namjena i ograničenja za izdavanja garancija**

### **Član 42. (Namjena garancija)**

- (1) Federacija, kanton, grad i općina mogu izdavati garancije u sljedeće svrhe:
  - a) za finansiranje kapitalne investicije koja je odobrena u Programu javnih investicija Federacije ili kantona sa visokim rangom prioriteta;
  - b) za finansiranje programa restrukturiranja ili finansijske sanacije privrednog subjekta koji pruža usluge od javnog interesa, ukoliko je takav program u skladu s propisima o državnoj pomoći i prethodno odobren od strane nadležnog zakonodavnog ili predstavničkog tijela.
- (2) Izuzetno od stava (1) ovog člana, Federacija može izdavati garancije u svrhu uspostavljanja i finansiranja posebnih kreditnih linija ili programa odobrenih od strane Parlamenta Federacije ukoliko je kreditor međunarodna finansijska institucija.
- (3) Federacija, kanton, grad ili općina ne mogu izdati garanciju za refinansiranje i reprogramiranje postojećeg duga dužnika kod istog povjerioca.

**Član 43.**  
**(Ročnost garancija)**

- (1) Kod kapitalnih investicija garantovani dug dospijeva i plativ je na datum koji ne prelazi vrijeme amortizacije tih investicija, a najduže do 25 godina.
- (2) Garancija se izdaje na određeni vremenski period koji ne može biti duži od trajanja preuzete finansijske obaveze.

**Odjeljak D. Procedure za izdavanje garancija**

**Član 44.**  
**(Zahtjev za izdavanje garancija)**

- (1) Tražilac garancije u skladu sa ovim Zakonom, podnosi zahtjev za izdavanje garancije na propisanom obrascu.
- (2) Uz zahtjev iz stava (1) ovog člana i potvrdu o uplaćenju administrativnoj taksi, tražilac garancije dostavlja dokumentaciju na osnovu koje se može procijeniti finansijsko stanje dužnika i njegova solventnost, te informacije u vezi s povjerenicom.

**Član 45.**  
**(Ovlaštenje za donošenje propisa)**

- (1) Federalni ministar finansija će propisati postupak izdavanja garancija, formu obrasca za izdavanje garancije, dokumentaciju koja treba biti dostavljena uz zahtjev za izdavanje garancije, kriterije podobnosti tražioca garancije, dokumentaciju koju je potrebno dostaviti Vladi Federacije, vladi kantona, gradonačelniku, odnosno načelniku uz nacrt odluke za izdavanje garancije, preporučeni elementi sporazuma ili izjave o garanciji, način obračuna i naplate premije i provizije za garanciju i vremenski rok u kom je tražilac garancije obavezan izvršiti plaćanje premije i provizije.

**Član 46.**  
**(Postupak donošenja odluke o izdavanju garancije)**

- (1) Po prijemu zahtjeva za izdavanje garancije Federacije uz prateću dokumentaciju, Federalno ministarstvo finansija odmah obavlja preliminarni pregled kako bi provjerilo prijem svih validnih i vjerodostojnih informacija i dokumentacije potrebnih za procjenu kreditnog rizika.
- (2) Tražilac garancije će Federalnom ministarstvu finansija dostaviti nacrt akta kojim se preuzima finansijska obaveza, dopustiti Federalnom ministarstvu finansija učešće u pregovorima koji se tiču sačinjavanja gore navedenog akta, te ni u kom slučaju neće pristupiti zaključenju ili izdavanju akta kojim se preuzima finansijska obaveza prije nego što Federalno ministarstvo finansija da saglasnost na njegov sadržaj.
- (3) Federalno ministarstvo finansija će, vodeći računa o državnoj pomoći u obliku garancija, propisati kriterije, metodologiju i proceduru za procjenu rizika, na temelju kojih će biti izvršena procjena rizika.
- (4) U skladu sa propisom iz stava (3) ovog člana Federalno ministarstvo finansija vrši procjenu rizika, odnosno utvrđivanje nivoa rizika kojem se Federacija izlaže ukoliko se garancija odobri.

(5) Ako je to potrebno, prilikom utvrđivanja rizika u skladu sa ovim Zakonom, Federalno ministarstvo finansija može zatražiti pomoć u vidu eksternog pravnog, risk, poreznog, računovodstvenog ili nekog drugog ekspertnog mišljenja s ciljem uvida u sve relevantne aspekte transakcije.

(6) Profesionalni vanjski savjetnik iz stava (5) ovog člana, uz potrebnu stručnost i sposobnost, mora ispunjavati zahtjeve nezavisnosti za obavljanje procjene rizika.

(7) Dostavljanje potpune dokumentacije u skladu sa ovim Zakonom i propisima koji iz njega proizlaze, samo po sebi podnosiocu zahtjeva ne garantuje pravo na izdavanje garancije.

(8) Federalno ministarstvo finansija dužno je u roku, ne kraćem od 30 radnih dana i ne dužem od 90 radnih dana od dana prijema potpunog zahtjeva za izdavanje garancije, izvršiti analizu dokumentacije i procjenu rizika, te Vladi Federacije, uz informaciju o traženoj garanciji, dostaviti:

- a) Kratak opis kapitalne investicije iz člana 42. stav (1) tačka a) ili programa iz člana 42. stav (1) tačka b) ovog Zakona
- b) Mišljenje Federalnog ministarstva finansija i nadležnog ministarstva
- c) Nacrt akta kojim se preuzima finansijska obaveza
- d) Odluku nadležnog organa tražioca garancije o prethodnoj saglasnosti za zaduživanje osim u slučaju zaduživanja kantona, grada ili općine
- e) Nacrt odluke o izdavanju garancije.

(9) U slučaju angažovanja profesionalnog vanjskog savjetnika za procjenu rizika, rok iz stava (6) ovog člana biti će produžen za rok potreban za procjenu rizika određen ugovorom sa profesionalnim vanjskim savjetnikom.

(10) Vlada Federacije utvrđuje prijedlog odluke o izdavanju garancije Federacije koji dostavlja Parlamentu Federacije na usvajanje.

(11) Odluku o izdavanju garancije donosi Parlament Federacije.

(12) Sporazum ili izjavu o garanciji potpisuje Federalni ministar finansija.

(13) Odredbe ovog člana na odgovarajući način primjenjuju kantoni, gradovi i općine.

#### **Član 47.**

##### **(Praćenje procesa izdavanja garancija)**

(1) Procedure praćenja procesa izdavanja garancija Federacije, usklađene sa propisima o državnoj pomoći, utvrđuju se propisom koji donosi Federalno ministarstvo finansija.

(2) Tražilac garancije, odnosno dužnik je dužan obavijestiti davaoca garancije u slučaju bilo kakve promjene pravnog statusa, te u slučaju finansijskih teškoća.

(3) Promjene akta kojim je preuzeta finansijska obaveza moraju biti odobrene od strane nadležnog zakonodavnog tijela.

(4) U slučaju da je tražilac garancije privatni subjekt, ništavne su bilo kakve promjene odredbi akta kojim je preuzeta finansijska obaveza koju osigurava garancija, ukoliko nisu odobrene od strane nadležnog zakonodavnog tijela.

(5) U slučaju promjene akta kojim se preuzima finansijska obaveza, provodi se procedura iz člana 46. ovog Zakona.

#### **Član 48.**

##### **(Uslovi za potpis ugovora o izdavanju garancije)**

Ugovor o izdavanju garancije se potpisuje nakon ispunjenja svih uslova kako slijedi:

- a) usvajanje odluke o izdavanju garancije od strane nadležnog zakonodavnog ili predstavničkog tijela,
- b) objave odluke o izdavanju garancije u službenom glasilu,
- c) dostavljanja odluke nadležnog organa tražioca garancije o davanju saglasnosti na zaduženje.

#### **Član 49. (Izdavanje garancije)**

Garancija se izdaje nakon ispunjenja uslova utvrđenih ovim Zakonom i ostalih uslova iz ugovora o izdavanju garancije, a stupa na snagu danom potpisivanja.

#### **Član 50. (Primjena odredbi)**

Odredbe čl. 46. do 49. na odgovarajući način primjenjuju kantoni, gradovi i općine.

### **Odjeljak E. Garancijski fond**

#### **Član 51. (Status Garancijskog fonda)**

(1) Garancijski fond Federacije Bosne i Hercegovine (u daljem tekstu: Garancijski fond) predstavlja poseban budžetski fond sa podračunom u okviru Jedinstvenog računa Trezora Federacije koji je namijenjen za plaćanje po aktiviranim garancijama.

(2) Sredstva Garancijskog fonda se akumuliraju uplatama administrativnih taksi iz člana 53. stav 2. ovog Zakona, provizija i premija rizika, namjenskih novčanih depozita iz člana 6. stav 2. ovog Zakona, prihoda od investiranja sredstava Garancijskog fonda na otvorenom tržištu, sredstava iz budžeta Federacije, sredstava proisteklih iz naplaćenih potraživanja po osnovu aktiviranih garancija, te ostalim uplatama ako je to potrebno.

(3) Sredstva iz Garancijskog fonda se isplaćuju isključivo novčanim odlivima po aktiviranim garancijama, povratom namjenskih novčanih depozita i ne mogu se koristiti u druge svrhe.

(4) Planiranje finansiranja i održavanje Garancijskog fonda u nadležnosti je Vlade Federacije, a administrativni poslovi su u nadležnosti Federalnog ministarstva finansija.

(5) Sredstva Garancijskog fonda do visine ukupnih potencijalnih obaveza koje dospijevaju u toj godini će obavezno biti planirana budžetom za navedenu godinu.

#### **Član 52. (Uspostavljanje i upravljanje Garancijskim fondom)**

(1) Vlada Federacije donosi propis kojim se utvrđuje uspostavljanje, način finansiranja i upravljanja Garancijskim fondom, iznos i način naplate administrativne takse, način obračuna i naplate provizije i premije rizika, dinamika punjenja Garancijskog fonda, te minimalni nivo pokrivenosti garantovanog a neotplaćenog duga, te druga pitanja koje se odnose na upravljanje sredstvima Garancijskog fonda.

(2) Ukupna vrijednost i struktura Garancijskog fonda utvrđuju se Zakonom o izvršenju budžeta Federacije.

**Član 53.**  
**(Napлата administrativne takse, provizije i premije rizika)**

- (1) Federalno ministarstvo finansija ovlašteno je naplatiti administrativnu taksu na zahtjev za izdavanje garancije, te obračunati i naplatiti proviziju i premiju rizika za svaku izdatu garanciju.
- (2) Administrativna taksa predstavlja iznos koji se utvrđuje propisom Vlade Federacije iz člana 52. ovog Zakona, predstavlja bespovratnu naknadu za fiksne i varijabilne administrativne troškove koji se generiraju prilikom procesuiranja zahtjeva za odobrenje garancije, a uplaćuje se u korist Garancijskog fonda prilikom podnošenja zahtjeva za izdavanje garancije.
- (3) Federalno ministarstvo finansija je ovlašteno naplatiti bespovratnu proviziju, kao preduslov za izdavanje garancije, na osnovu iznosa garancije koja se izdaje.
- (4) Provizija se obračunava u procentu na iznos garancije, a naplaćuje se s ciljem osiguranja kontinuiteta sistema izdavanja garancija Federacije.
- (5) U slučaju odobrenja zahtjeva za izdavanje garancije, iznos provizije iz stava (1) ovog člana će biti umanjen za iznos plaćene administrativne takse.
- (6) Premija rizika proporcionalna je nivou rizika po izdatoj garanciji i iskazuje se u procentu od iznosa duga na koji se izdaje garancija. Procenat premije rizika se utvrđuje jednokratno prilikom odobravanja izdavanja garancije, a premija rizika se utvrđuje i naplaćuje godišnje, primjenom utvrđenog procenta na ostatak duga koji garancija pokriva.
- (7) Administrativna taksa, provizija i premije rizika uplaćuju se na Jedinstveni račun Trezora Federacije u korist Garancijskog fonda.

**Član 54.**  
**(Investiranje sredstava)**

- (1) U svrhu povećanja sredstava, novac koji stoji na raspolaganju Garancijskom fondu se može investirati u operacije na otvorenom tržištu.
- (2) Federalno ministarstvo finansija odlučuje o investiranju sredstava Garancijskog fonda u skladu sa propisima o investiranju javnih sredstava i propisom Vlade Federacije iz člana 52. ovog Zakona.

**Član 55.**  
**(Primjena odredbi)**

Odredbe čl. 51. do 54. na odgovarajući način primjenjuju kantoni, gradovi i općine.

**Odjeljak F. Praćenje garancija i plaćanje po osnovu garancija Federacije, kantona, grada i općine**

**Član 56.**  
**(Praćenje garancija)**

- (1) Federalno ministarstvo finansija je dužno redovno pratiti izdate garancije i otplatu duga po izdatim garancijama.
- (2) Federalno ministarstvo finansija je dužno vršiti analizu portfolija izdatih garancija s ciljem procjene rizičnosti portfolija u svrhu predviđanja i pripreme za moguću aktivaciju garancije.

(3) Tražilac garancije, odnosno dužnik je odgovoran za dostavljanje informacija i dokumenata Federalnom ministarstvu finansija definiranih ugovorom o izdavanju garancije u rokovima utvrđenim ugovorom.

(4) Federalno ministarstvo finansija ima pravo da izvrši ad-hoc reviziju ili pregled, te da u svakom trenutku od tražioca garancije, odnosno dužnika zahtijeva dostavljanje i drugih relevantnih informacija i dokumentacije, a tražilac garancije odnosno dužnik ima obavezu dostaviti sve tražene informacije i dokumentaciju.

#### **Član 57. (Godišnji pregled izdatih garancija)**

(1) Federalno ministarstvo finansija obavlja godišnji pregled svih izdatih garancija Federacije na osnovu kojih može nastati obaveza za Federaciju, s tim što će se pregled završiti najkasnije do usvajanja budžeta za narednu fiskalnu godinu.

(2) Pregledom iz stava (1) ovog člana će se procijeniti iznos potencijalnih obaveza na osnovu izdatih garancija Federacije za narednu fiskalnu godinu, te procijeniti struktura i vrijednost Garancijskog fonda.

(3) Procedure i vremenski okvir koji se odnosi na godišnji pregled garancija utvrđuju se propisom Federalnog ministarstva finansija.

#### **Član 58. (Plaćanje na osnovu garancija)**

(1) U slučaju da dužnik ne izvrši uplatu ili uplate u skladu sa uslovima finansijske obaveze i povjerilac potvrdi da je pokušao naplatiti potraživanje od dužnika aktiviranjem svih drugih osiguranja po finansijskoj obavezi, povjerilac može dostaviti Federalnom ministarstvu finansija zahtjev za plaćanje obaveze.

(2) U zahtjevu za plaćanje iz stava (1) ovog člana navodi se iznos glavnice duga koji nije otplaćen i iznos neplaćenih ili zaostalih troškova finansiranja. Nakon što utvrdi da je zahtjev za plaćanje iz stava (1) ovog člana osnovan i u skladu sa uvjetima iz sporazuma o garanciji, Federalno ministarstvo finansija izvršit će uplatu neizmirenih dospjelih obaveza povjeriocu u roku od 15 radnih dana od dana podnošenja zahtjeva.

#### **Član 59. (Primjena odredbi)**

Odredbe čl. 56. do 58. na odgovarajući način primjenjuju kantoni, gradovi i općine.

### **Odjeljak G. Naplata potraživanja na osnovu izdatih garancija Federacije, kantona, grada, odnosno općine**

#### **Član 60. (Regresno pravo i naplata potraživanja)**

(1) Nakon izvršenog plaćanja na osnovu garancije Federacije, Federalno ministarstvo finansija bit će nosilac svih prava i potraživanja koja je imao povjerilac prema tražiocu garancije, a u skladu sa ugovorom o izdavanju garancije, u omjeru svih plaćanja koje je Federalno ministarstvo finansija izvršilo prema toj garanciji.

(2) Obaveza tražioca garancije da izvrši uplatu Federalnom ministarstvu finansija je bezuvjetna i apsolutna na osnovu izvršenog plaćanja neizmirenih dospjelih obaveza povjeriocu kao korisniku garancije od strane Federalnog ministarstva finansija.

(3) Federalno ministarstvo finansija je ovlašteno za provođenje procesa naplate potraživanja u skladu sa st. (1) i (2) ovog člana, te za poduzimanje svih mjera u skladu sa zakonom, u cilju povrata svih iznosa plaćenih na osnovu garancija, uključujući i prateće troškove.

(4) Federalno ministarstvo finansija je ovlašteno u sklopu procesa naplate potraživanja obračunati i naplatiti zateznu kamatu na sve iznose plaćene povjeriocu po osnovu izdate garancije.

(5) Postupak naplate potraživanja po osnovu izdatih garancija se utvrđuje propisom Federalnog ministarstva finansija.

### **Član 61. (Mjere za naplatu potraživanja)**

(1) U postupku naplate potraživanja iz člana 60. ovog Zakona Federalno ministarstvo finansija može koristiti sljedeće mjere:

- a) restrukturiranje zaduženja;
- b) aktiviranje mjenica dužnika dostavljenih u svrhu osiguranja garancije;
- c) aktiviranje dodatnih kolaterala dostavljenih kao osiguranje garancije;
- d) zapljenu javnih sredstava dužnika;
- e) ostale metode u skladu sa važećim zakonima i propisima.

(2) Za slučajeve za koje Federalno ministarstvo finansija ocijeni da je to potrebno, za proces naplate potraživanja moguće je angažovati eksterna lica koja svojim kvalifikacijama, stručnošću i iskustvom mogu doprinijeti efikasnijem procesu naplate.

(3) U slučaju angažmana eksternog lica iz stava (2) ovog člana, odluku o pokretanju procesa naplate potraživanja donosi te njegovo praćenje provodi Federalno ministarstvo finansija.

(4) Proces prenošenja procesa naplate na eksterno lice ili organizacija istog u saradnji sa eksternim licem se utvrđuje propisom Federalnog ministarstva finansija.

### **Član 62. (Prijenos potraživanja i rješavanje sporova)**

(1) Korisnik garancije ne može prenijeti svoja potraživanja na treće lice bez prethodno pribavljene pisane saglasnosti Federalnog ministarstva finansija.

(2) Prilikom rješavanja sporova koji proizlaze iz izdatih garancija, primjenjivat će se pozitivno pravo Bosne i Hercegovine i Federacije Bosne i Hercegovine.

### **Član 63. (Primjena odredbi)**

Odredbe čl. 60. do 62. na odgovarajući način primjenjuju kantoni, gradovi i općine.

## **Odjeljak H. Prestanak garancija**



**Član 64.**  
**(Prestanak garancija)**

- (1) Garancija Federacije prestaje kada je:
  - a) dužnik otplatio zajam na koji se odnosi garancija;
  - b) rok garancije istekao;
  - c) Federacija izvršila uplate u skladu sa uvjetima iz garancije.
- (2) Federalno ministarstvo finansija konstatira i evidentira prestanak garancije.
- (3) Odredbe ovog člana na odgovarajući način primjenjuju kantoni, gradovi i općine.

**POGLAVLJE V. EVIDENCIJE I IZVJEŠTAVANJE**

**Odjeljak A. Evidencije i obaveze dostavljanja podataka o dugu i garancijama**

**Član 65.**  
**(Uspostavljanje i vođenje evidencije)**

- (1) Federacija, kanton, grad i općina dužni su uspostaviti i voditi evidencije o dugu i garancijama iz svoje nadležnosti.
- (2) Federalno ministarstvo finansija uspostavlja i vodi evidenciju o javnom dugu Federacije i garancijama Federacije, javnom dugu i garancijama kantona, gradova i općina, te dugu javnih preduzeća iz nadležnosti Federacije.
- (3) Kantonalno ministarstvo finansija uspostavlja i vodi evidencije o javnom dugu i garancijama kantona, te o dugu javnih preduzeća iz nadležnosti kantona.
- (4) Grad i općina uspostavljaju i vode evidencije o javnom dugu i garancijama grada, odnosno općine, te dugu javnih preduzeća iz nadležnosti grada, odnosno općine.

**Član 66.**  
**(Obaveze kantona, gradova i općina)**

- (1) Kanton je dužan Federalnom ministarstvu finansija dostavljati podatke o dugu i garancijama kantona.
- (2) Kanton je dužan izvještavati Federalno ministarstvo finansija o dugu javnih preduzeća iz nadležnosti kantona.
- (3) Grad i općina su dužni dostavljati podatke Federalnom ministarstvu finansija o dugu i garancijama grada, odnosno općine.
- (4) Grad i općina su dužni izvještavati Federalno ministarstvo finansija o dugu javnih preduzeća iz nadležnosti grada, odnosno općine.

**Član 67.**  
**(Obaveze vanbudžetskih fondova)**

- (1) Federalni vanbudžetski fond dužan je dostavljati podatke o svom dugu Federalnom ministarstvu finansija.

(2) Vanbudžetski fond kantona dužan je podatke o svom dugu dostavljati istovremeno kantonalnom ministarstvu finansija i Federalnom ministarstvu finansija.

**Član 68.**  
**(Obaveze vanbudžetskih korisnika)**

(1) Vanbudžetski korisnik Federacije dužan je dostavljati podatke o svom dugu Federalnom ministarstvu finansija.

(2) Vanbudžetski korisnik kantona dužan je podatke o svom dugu dostavljati istovremeno kantonalnom ministarstvu finansija i Federalnom ministarstvu finansija.

(3) Vanbudžetski korisnik grada, odnosno općine dužan je podatke o svom dugu dostavljati istovremeno službi za finansije grada, odnosno općine i Federalnom ministarstvu finansija.

**Član 69.**  
**(Obaveze javnih zdravstvenih ustanova)**

(1) Javna zdravstvena ustanova čiji je osnivač Federacija i na čije finansijske planove nadležni organ Federacije daje saglasnost, a koja je do dana stupanja na snagu ovog Zakona stvorila obaveze na osnovu direktnog unutrašnjeg duga, dužna je u roku od 60 dana od dana stupanja na snagu ovog Zakona dostaviti podatke i prateću dokumentaciju o svim takvim neizmirenim dugovima Federalnom ministarstvu finansija.

(2) Javna zdravstvena ustanova čiji je osnivač kanton i na čije finansijske planove nadležni organ kantona daje saglasnost, a koja je do dana stupanja na snagu ovog Zakona stvorila obaveze na osnovu direktnog unutrašnjeg duga, dužna je u roku od 60 dana od dana stupanja na snagu ovog Zakona dostaviti podatke o svim takvim neizmirenim dugovima kantonalnom ministarstvu finansija i Federalnom ministarstvu finansija.

(3) Javna zdravstvena ustanova iz stava (2) ovog člana kantonalnom ministarstvu finansija dužna je dostaviti i prateću dokumentaciju koja se odnosi na neizmirene dugove.

(4) Javna zdravstvena ustanova čiji je osnivač grad ili općina i na čije finansijske planove nadležni organ grada, odnosno općine daje saglasnost, a koja je do dana stupanja na snagu ovog Zakona stvorila obaveze na osnovu direktnog unutrašnjeg duga, dužna je u roku od 60 dana od dana stupanja na snagu ovog Zakona dostaviti podatke o svim takvim neizmirenim dugovima službi za finansije grada, odnosno općine i Federalnom ministarstvu finansija.

(5) Javna zdravstvena ustanova iz stava (4) ovog člana službi za finansije grada, odnosno općine dužna je dostaviti i prateću dokumentaciju koja se odnosi na neizmirene dugove.

**Član 70.**  
**(Obaveze javnih preduzeća)**

(1) Javno preduzeće iz nadležnosti Federacije dužno je podatke o svom dugu dostavljati Federalnom ministarstvu finansija.

(2) Javno preduzeće iz nadležnosti kantona dužno je podatke o svom dugu dostavljati kantonalnom ministarstvu finansija.

(3) Javno preduzeće iz nadležnosti grada i općine dužno je podatke o svom dugu dostavljati službi za finansije grada, odnosno općine.

**Član 71.**

## **(Obaveza dostavljanja podataka o dugu i garancijama institucijama Bosne i Hercegovine)**

Federalno ministarstvo finansija dužno je podatke o dugu i garancijama u Federaciji dostavljati nadležnim institucijama Bosne i Hercegovine, u skladu sa propisima Bosne i Hercegovine koji uređuju dug, zaduživanje i garancije i sistem državne pomoći.

### **Član 72.**

#### **(Dostavljanje prateće dokumentacije o nastalom zaduženju)**

(1) Federalni vanbudžetski fondovi, vanbudžetski korisnici Federacije, javna preduzeća iz nadležnosti Federacije i javne zdravstvene ustanove iz člana 69. stav (1) ovog Zakona koje su do dana stupanja na snagu ovog Zakona stvorile obaveze na osnovu direktnog unutrašnjeg duga, dužne su u roku od 60 dana od dana stupanja na snagu ovog Zakona dostaviti informacije i prateću dokumentaciju o svim takvim neizmirenim dugovima Federalnom ministarstvu finansija.

(2) Vanbudžetski fondovi i vanbudžetski korisnici kantona i javna preduzeća iz nadležnosti kantona koji su do dana stupanja na snagu ovog Zakona stvorili obaveze na osnovu direktnog unutrašnjeg duga, dužni su u roku od 60 dana od dana stupanja na snagu ovog Zakona dostaviti informacije i prateću dokumentaciju o svim takvim neizmirenim dugovima kantonalnom ministarstvu finansija.

(3) Vanbudžetski korisnici grada i općine, javna preduzeća iz nadležnosti grada i općine, koji su do dana stupanja na snagu ovog Zakona stvorili obaveze na osnovu direktnog unutrašnjeg duga, dužni su u roku od 60 dana od dana stupanja na snagu ovog Zakona dostaviti informacije i prateću dokumentaciju o svim takvim neizmirenim dugovima službi za finansije grada, odnosno općine.

### **Član 73.**

#### **(Evidencije o dugu i garancijama)**

Federalni ministar finansija donosi propis kojim se utvrđuje sadržaj evidencija iz člana 65. ovog Zakona, uređuje način vođenja evidencija o dugu i garancijama, postupak i rokove dostavljanja i evidentiranja podataka o dugu i garancijama, te druge elemente od značaja za izvještavanje i upravljanje dugom.

## **Odjeljak B. Izvještavanje i objavljivanje informacija o dugu i garancijama**

### **Član 74.**

#### **(Izvještavanje o dugu)**

(1) Federacija, kanton, grad i općina su dužni sačinjavati i objavljivati kvartalne izvještaje o dugu i garancijama i godišnje izvještaje o upravljanju dugom.

(2) Federalno ministarstvo finansija dužno je sačinjavati i Vladi Federacije dostavljati na razmatranje kvartalne izvještaje o dugu i garancijama Federacije, kvartalne izvještaje o ukupnom javnom dugu Federacije i godišnje izvještaje o upravljanju dugom Federacije.

(3) Kantonalno ministarstvo finansija dužno je sačinjavati i vladi kantona dostavljati kvartalne izvještaje o javnom dugu kantona i garancijama kantona, te godišnje izvještaje o upravljanju javnim dugom kantona.

(4) Grad i općina su dužni sačinjavati i gradskom odnosno općinskom vijeću dostavljati na razmatranje kvartalne izvještaje o javnom dugu grada odnosno općine, te godišnje izvještaje o upravljanju dugom grada odnosno općine.

## **Član 75.**

### **(Minimalan sadržaj, način i rokovi dostavljanja izvještaja)**

Federalni ministar finansija donosi propis kojim se utvrđuje minimalan sadržaj, način i rokovi dostavljanja izvještaja iz člana 74. ovog Zakona, te način i rokovi objavljivanja informacija o dugu i garancijama javnog sektora Federacije.

## **POGLAVLJE VI. GORNJE GRANICE I UPRAVLJANJE DUGOM**

### **Odjeljak A. Gornje granice javnog duga i garancija**

#### **Član 76.**

#### **(Gornja granica i mjere za stabilizaciju ukupnog javnog duga )**

- (1) Ukupan javni dug Federacije može iznositi najviše 60% BDP-a Federacije.
- (2) Ukoliko ukupan javni dug Federacije dostigne 50% BDP-a, Federalno ministarstvo finansija u roku od 30 dana informiše Vladu Federacije o dostizanju limita zaduženosti i predlaže mjere za optimizaciju upravljanja javnim dugom.
- (3) Vlada Federacije je u roku od 60 dana od dostavljanja prijedloga Federalnog ministarstva finansija iz stava (2) ovog člana dužna utvrditi mjere za optimizaciju upravljanja javnim dugom.
- (4) Ukoliko ukupan javni dug Federacije dostigne 55% BDP-a, Federalno ministarstvo finansija u roku od 30 dana informiše Vladu Federacije, te predlaže dodatne mjere za optimizaciju upravljanja javnim dugom, uključujući i mjere iz stava (5) ovog člana.
- (5) Vlada Federacije na prijedlog Federalnog ministarstva finansija utvrđuje mjere za smanjenje tekućih rashoda u iznosu od najmanje 3% rashoda utvrđenih u budžetu Federacije za tekuću godinu prilagođenih razmjerno preostalom periodu tekuće godine. Vlada Federacije predlaže Parlamentu Federacije usvajanje utvrđenih mjera koje će se primjenjivati dok se udio javnog duga Federacije u BDP-u Federacije, izračunatog prema kriterijima navedenim u ovom članu, ne svede ispod 55%.
- (6) Osnovica ukupnih tekućih rashoda koja se uzima u obzir u kalkulaciji za smanjenje tekućih rashoda se umanjuje za:
  - a) rashode za penzije;
  - b) izdatke za kamate;
  - c) rashode koji su pokriveni fondovima Evropske unije ili drugim bespovratnim sredstvima različitih organizacija;
  - d) rashode za likvidaciju šteta uzrokovanih prirodnim katastrofama;
  - e) doprinose za članstva Bosne i Hercegovine u međunarodnim organizacijama prema međunarodnim ugovorima.
- (7) Odredba stava (5) ovog člana se ne primjenjuje:
  - a) u slučaju znatnog pogoršanja ekonomskog rasta tokom 24 mjeseca počev od prvog dana kalendarskog mjeseca nakon objave godišnjeg smanjenja realnog bruto domaćeg proizvoda u zadnjem kvartalu od najmanje 2,5% ili oko 6% u posljednje tri godine od strane nadležnog zavoda za statistiku;
  - b) u slučaju prirodnih nepogoda, tehničko-tehnoloških nesreća, drugih nesreća definiranih Zakonom o zaštiti i spašavanju ljudi i materijalnih dobara od prirodnih i drugih nesreća ili rata;
  - c) u slučaju objave vanrednih mjera radi povećanja sposobnosti sigurnosnih snaga u slučaju pogoršanja sigurnosne situacije;
  - d) u periodu od 24 mjeseca počev od prvog dana kalendarskog mjeseca nakon što Federalno ministarstvo finansija objavi ukupne potrebne troškove budžeta Federacije povezane sa saniranjem posljedica prirodnih nepogoda ili nesreća te troškova nastalih implementacijom međunarodnih ugovora i drugih međunarodnih obaveza Federacije koji prelaze 3% BDP-a Federacije.

(8) Ukoliko ukupan javni dug Federacije dostigne 58% BDP-a Federacije dodatno povećanje ukupnog javnog duga Federacije moguće je samo uz odobrenje Parlamenta Federacije.

(9) Ukoliko je garancija Federacije, kantona, grada ili općine izdata u skladu sa ovim Zakonom ili zakonom koji je bio na snazi u vrijeme izdavanja garancije, zaduženje nastalo zbog plaćanja takve garancije nije predmet ograničenja zaduženja iz ovog člana.

#### **Član 77.**

##### **(Gornja granica za izdavanje garancija Federacije)**

Ukupna nominalna vrijednost neotplaćenog garantovanog duga Federacije, kantona, gradova i općina, isključujući neotplaćeni garantovani javni dug i indirektno garancije kantona, gradova i općina, ne može biti veća od 25% BDP-a Federacije.

#### **Član 78.**

##### **(Gornja granica javnog duga i izdavanja garancija kantona)**

(1) Javni dug kantona, uključujući i neotplaćeni garantovani dug koji nije uključen u javni dug kantona može iznositi najviše do iznosa prosječnih redovnih prihoda budžeta kantona ostvarenih u posljednje tri fiskalne godine.

(2) Kanton se može zadužiti ili izdati garanciju u okvirima ukupnih ograničenja iz stava (1) ovog člana ukoliko u vrijeme odobrenja zaduženja ili izdavanja garancije iznos servisiranja duga i potencijalnog duga koji dospijeva u svakoj narednoj godini, uključujući i servisiranje za predloženo novo zaduženje ili izdavanje garancije ne prelazi 15% prosječnih redovnih prihoda ostvarenih u posljednje tri fiskalne godine.

(3) U okviru ograničenja iz stava (2) ovog člana iznos servisiranja duga koji je alociran ili se alocira na budžet kantona može iznositi najviše do 10% prosječnih redovnih prihoda ostvarenih u posljednje tri fiskalne godine.

(4) Ukoliko je garancija izdata u skladu sa ovim Zakonom ili zakonom koji je bio na snazi u vrijeme izdavanja garancije, zaduženje nastalo zbog plaćanja takve garancije nije predmet ograničenja zaduženja iz stava (3) ovog člana.

(5) Ukoliko javni dug kantona i neotplaćeni garantovani dug iz stava (1) ovog člana dostigne visinu prosječnih redovnih prihoda budžeta kantona ostvarenih u posljednje tri fiskalne godine, dodatno povećanje javnog duga kantona i izdavanje garancija kantona moguće je samo uz odobrenje Parlamenta Federacije.

#### **Član 79.**

##### **(Gornja granica javnog duga i izdavanja garancija grada ili općine)**

(1) Javni dug grada i općine, uključujući i neotplaćeni garantovani dug koji nije uključen u javni dug grada može iznositi najviše do dvostrukog iznosa prosječnih redovnih prihoda budžeta grada odnosno općine ostvarenih u posljednje tri fiskalne godine.

(2) Grad i općina mogu se zadužiti ili izdati garanciju u okvirima ukupnih ograničenja iz stava (1) ovog člana ukoliko u vrijeme odobrenja zaduženja ili izdavanja garancije iznos servisiranja duga i potencijalnog duga koji dospijeva u svakoj narednoj godini, uključujući i servisiranje za predloženo novo zaduženje ili izdavanje garancije ne prelazi 18% prosječnih redovnih prihoda grada odnosno općine ostvarenih u posljednje tri fiskalne godine.

(3) U okviru ograničenja iz stava (2) ovog člana iznos servisiranja duga koji je alociran ili se alocira na budžet grada ili općine može iznositi najviše do 10% prosječnih redovnih prihoda grada, odnosno općine ostvarenih u posljednje tri fiskalne godine.

(4) Ukoliko je garancija izdata u skladu sa ovim Zakonom ili zakonom koji je bio na snazi u vrijeme izdavanja garancije, zaduženje nastalo zbog plaćanja takve garancije nije predmet ograničenja zaduženja iz stava (3) ovog člana.

(5) Ukoliko javni dug grada ili općine i neotplaćeni garantovani dug iz stava (1) ovog člana dostigne visinu dvostrukih prosječnih redovnih prihoda budžeta grada odnosno općine ostvarenih u posljednje tri fiskalne godine, dodatno povećanje javnog duga grada ili općine i izdavanje garancija grada ili općine moguće je samo uz odobrenje Parlamenta Federacije.

## **Odjeljak B. Granice izloženosti Federacije, kantona, grada i općine**

### **Član 80.**

#### **(Granice izloženosti Federacije prema kantonu, gradu i općine)**

(1) Pojedinačna izloženost Federacije po osnovu indirektnog duga i neotplaćenog garantovanog duga prema kantonu ne može biti veća od 50% u odnosu na prosječne redovne pojedinačne prihode kantona ostvarene u posljednje tri fiskalne godine.

(2) U okviru ograničenja iz stava (1) ovog člana izloženost Federacije u odnosu na servis indirektnog duga i neotplaćenog garantovanog duga kantona koji dostiže u svakoj narednoj godini može iznositi najviše do 10% prosječnih redovnih prihoda kantona ostvarenih u posljednje tri fiskalne godine.

(3) Pojedinačna izloženost Federacije po osnovu indirektnog duga i neotplaćenog garantovanog duga prema gradu i općini ne može biti veća od prosječnih redovnih pojedinačnih prihoda grada i općine ostvarenih u posljednje tri fiskalne godine.

(4) U okviru ograničenja iz stava (3) ovog člana izloženost Federacije u odnosu na servis indirektnog duga i neotplaćenog garantovanog duga grada i općine koji dostiže u svakoj narednoj godini može iznositi najviše do 10% prosječnih redovnih prihoda grada i općine ostvarenih u posljednje tri fiskalne godine.

### **Član 81.**

#### **(Granice izloženosti Federacije prema jednom sektoru, pravom licu ili grupi povezanih lica)**

(1) Pojedinačna izloženost Federacije prema jednom pravnom licu ili jednoj grupi povezanih pravnih lica po osnovu indirektnog duga i neotplaćenog garantovanog duga ne može biti veća od 8% BDP-a Federacije.

(2) Pojedinačna izloženost Federacije prema jednom sektoru po osnovu indirektnog duga i neotplaćenog garantovanog duga ne može biti veća od 15% BDP-a Federacije.

## **Član 82.**

### **(Granice izloženosti kantona, grada i općine prema jednom pravnom licu)**

- (1) Pojedinačna izloženost kantona po osnovu indirektnog duga i neotplaćenog garantovanog duga prema jednom pravnom licu ne može biti veća od 30% u odnosu na prosječne redovne pojedinačne prihode kantona ostvarene u posljednje tri fiskalne godine.
- (2) Pojedinačna izloženost grada i općine po osnovu indirektnog duga i neotplaćenog garantovanog duga prema jednom pravnom licu ne može biti veća od 30% u odnosu na dvostruke prosječne redovne pojedinačne prihode grada i općine ostvarene u posljednje tri fiskalne godine.

## **Odjeljak C. Upravljanje dugom**

### **Član 83.**

#### **(Nadležnost za upravljanje dugom)**

- (1) Federalno ministarstvo finansija upravlja dugom Federacije, nadzire dug i daje saglasnost za nova zaduženja kantona, gradova i općina, federalnih vanbudžetskih fondova, federalnih vanbudžetskih korisnika i javnih preduzeća iz nadležnosti Federacije koja su posljednje dvije godine uzastopno iskazala negativan finansijski rezultat, te nadzire dug i zaduživanje ostalih javnih preduzeća iz nadležnosti Federacije.
- (2) Ministarstvo finansija kantona upravlja dugom kantona, nadzire dug i daje saglasnost za nova zaduženja vanbudžetskih fondova kantona, vanbudžetskih korisnika kantona i javnih preduzeća iz nadležnosti kantona koja su posljednje dvije godine uzastopno iskazala negativan finansijski rezultat, te nadzire zaduživanje ostalih javnih preduzeća iz nadležnosti kantona.
- (3) Služba za finansije grada upravlja dugom grada, nadzire dug i nova zaduženja vanbudžetskih korisnika grada i javnih preduzeća iz nadležnosti grada. Gradonačelnik daje saglasnost za nova zaduženja vanbudžetskih korisnika grada i javnih preduzeća iz nadležnosti grada koja su posljednje dvije godine uzastopno iskazala negativan finansijski rezultat.
- (4) Odredbe stava (3) ovog člana na odgovarajući način primjenjuju općine.

### **Član 84.**

#### **(Ciljevi upravljanja dugom)**

Ciljevi upravljanja dugom su pravovremeno osiguranje finansijskih sredstava za finansiranje vladinih potreba uz prihvatljive troškove i rizike u srednjem i dugom roku, te razvoj i promocija domaćeg tržišta duga.

### **Član 85.**

#### **(Strategija upravljanja dugom)**

- (1) Vlada Federacije na prijedlog Federalnog ministarstva finansija usvaja strategiju upravljanja dugom.
- (2) Strategija upravljanja dugom je trogodišnji dokument koji se dostavlja Vladi na usvajanje zajedno sa Prijedlogom programa javnih investicija Federacije.
- (3) Izrada strategije upravljanja dugom zasniva se na ciljevima upravljanja dugom iz člana 84. ovog Zakona, a uzima u obzir sljedeće faktore:



- a) troškove i rizike postojećeg portfolija duga,
- b) makroekonomske okvire,
- c) projekcije servisiranja duga u narednom periodu,
- d) očekivane potrebe za zaduživanjem,
- e) tržišne uslove zaduživanja,
- f) druge faktore koji mogu biti relevantni za izradu strategije.

(4) Strategija upravljanja dugom sadrži smjernice upravljanja dugom i nivo prihvatljivosti rizika portfolija duga, planiranja zaduženja i izdavanje garancija, te druge aktivnosti koje se odnose na razvoj i promociju domaćeg tržišta duga.

(5) Nakon usvajanja, strategiju upravljanja dugom Vlada Federacije dostavlja Parlamentu Federacije, a Federalno ministarstvo finansija dužno je istu objaviti na svojoj internet stranici najkasnije 5 dana nakon usvajanja od strane Vlade Federacije.

(6) Sve operacije zaduživanja i upravljanja dugom zasnivaju se na usvojenoj strategiji upravljanja dugom.

### **Član 86. (Godišnji plan zaduživanja)**

(1) Vlada Federacije na prijedlog Federalnog ministarstva finansija usvaja godišnji plan zaduživanja u roku od 30 dana od dana usvajanja budžeta za odnosnu fiskalnu godinu.

(2) Izrada godišnjeg plana zaduživanja zasniva se na usvojenoj strategiji upravljanja dugom, usvojenom budžetu i prognozama novčanih tokova, a uključivat će:

- a) Planirane operacije zaduživanja tokom godine,
- b) Instrumente zaduživanja,
- c) Indikativno vrijeme zaduživanja.

(3) Godišnji plan zaduživanja se revidira i usklađuje po potrebi.

(4) Godišnji plan zaduživanja objavljuje se na internet stranici Federalnog ministarstva finansija, najkasnije u roku od 5 dana nakon usvajanja.

### **Član 87. (Godišnji izvještaj o upravljanju dugom)**

(1) Federalno ministarstvo finansija priprema godišnji izvještaj o upravljanju dugom Federacije kojim se prezentiraju rezultati i aktivnosti upravljanja dugom, garancije i aktivnosti pozajmljivanja, i drugi finansijski aranžmani koji su zaključeni tokom protekle fiskalne godine.

(2) Izvještaj iz stava (1) ovog člana sadrži sljedeće:

- a) Informacije o provedbi strategije upravljanja dugom i obrazloženja,
- b) Informacije o otplati duga, plaćenim kamatama i drugim povezanim troškovima,
- c) Informacije o svim nedospjelim kreditnim obavezama,
- d) Listu svih nedospjelih vrijednosnih papira,
- e) Informacije o izdatim garancijama, uključujući iznose i korisnike ovih garancija, informacije o dužnicima i procjenu fiskalnog rizika po izdatim garancijama,
- f) Informacije o svim odobrenim kreditima i operacijama pozajmljivanja, uključujući informacije o dužnicima, neotplaćenim obavezama i procjeni kreditnog rizika po ovim kreditima.

(3) Izvještaj iz stava (1) ovog člana Federalno ministarstvo finansija dostavlja Vladi Federacije zajedno sa izvještajem o izvršenju budžeta za proteklu fiskalnu godinu.

(4) Nakon razmatranja, izvještaj iz stava (1) ovog člana Vlada Federacije dostavlja Parlamentu Federacije, a Federalno ministarstvo finansija dužno je isti objaviti na svojoj internet stranici najkasnije 5 dana nakon razmatranja od strane Vlade.

### **Član 88. (Savjetodavna komisija za dug)**

(1) Vlada Federacije, na prijedlog Federalnog ministarstva finansija, imenuje Savjetodavnu komisiju za dug (u daljem tekstu: Komisija). Komisija ima 15 članova koju čine predstavnici sljedećih institucija:

- a) Federalno ministarstva finansija – dva člana
- b) Vanbudžetski fondovi – jedan član
- c) Kantonalna ministarstva finansija – po jedan član iz svakog kantona
- d) Savez općina i gradova – dva člana

(2) Zadaci Komisije su da pregleda i razmatra:

- a) Kvartalne izvještaje o javnom dugu Federacije
- b) Kvartalne izvještaje o javnom dugu kantona, gradova i općina
- c) Godišnje izvještaje o upravljanju dugom Federacije, kantona, gradova i općina
- d) Druge izvještaje i informacije u vezi s dugom javnog sektora u Federaciji

(3) Komisija ima savjetodavnu ulogu prema ministarstvima finansija i gradskim i općinskim službama za finansije i ovlaštena je davati preporuke i mišljenja u pogledu:

- a) Primjene i poboljšanja pravnog okvira koje uređuje dug, zaduživanje i garancije,
- b) Unapređenja razmjene informacija o izvorima finansiranja,
- c) Unapređenja prikupljanja i razmjene podataka o dugu i drugim potencijalnim obavezama,
- d) Poboljšanja praksi upravljanja dugom i novčanim tokovima,
- e) Unapređenja izvještavanja i koordinacije politika zaduživanja,
- f) Kreiranja planova za obuku i stručno usavršavanje službenika koji su uključeni u procese upravljanja dugom,
- g) Razvoja domaćeg tržišta duga.

(4) Komisija jednom godišnje podnosi izvještaj o svojim aktivnostima Vladi Federacije BiH, a kvartalno Federalnom ministarstvu finansija i kantonalnim ministarstvima finansija.

(5) Poslovníkom o radu na koji saglasnost daje Federalno ministarstvo finansija detaljnije se uređuju prava i obaveze članova Komisije, način rada i odlučivanja, te druga pitanja od značaja za njen rad.

(6) Federalno ministarstvo finansija pruža administrativnu podršku Komisiji.

### **Član 89. (Eksterna revizija)**

(1) Federalno ministarstvo finansija je dužno najmanje jednom u pet godina angažovati eksternog revizora s ciljem provjere djelotvornosti i efikasnosti operacija upravljanja dugom i djelotvornosti sistema interne kontrole.

(2) Pravno lice koje bude angažovano kao eksterni revizor mora posjedovati adekvatna stručna znanja i iskustvo na poslovima eksterne evaluacije, eksterne i interne revizije.

## **POGLAVLJE VII. NADZOR**

### **Član 90. (Nadzor)**

- (1) Nadzor nad primjenom odredbi ovog Zakona vrše Federalno ministarstvo finansija i ministarstva finansija kantona, u okvirima nadležnosti utvrđenih ovim Zakonom.
- (2) Poslove nadzora iz stava (1) ovog člana vrše budžetski inspektori Federalnog ministarstva finansija i ministarstava finansija kantona, svako u okviru svoje nadležnosti.

## **POGLAVLJE VIII. KAZNE NE ODREDBE**

### **Član 91. (Prekršaji)**

- (1) Novčanom kaznom u iznosu od 10.000 KM do 15.000 KM kaznit će se za prekršaj vanbudžetski fond, vanbudžetski korisnik, javno preduzeće koje je u posljednje dvije godine zaredom ostvarilo negativan finansijski rezultat i pravno lice koje ima neotplaćen dug za koji je izdata garancija Federacije, kantona, grada i općine ako zaključi ugovor o kreditu, zajmu i finansijskom lizingu bez prethodne pisane saglasnosti iz člana 17., 18. i 19. ovog Zakona.
- (2) Za prekršaj iz stava (1) ovog člana novčanom kaznom u iznosu od 1.500 KM do 3.000 KM kaznit će se i odgovorno lice vanbudžetskog fonda, vanbudžetskog korisnika, javnog preduzeća i pravnog lica iz stava (1) ovog člana.
- (3) Novčanom kaznom u iznosu od 5.000 KM do 10.000 KM kaznit će se za prekršaj javno preduzeće ako ne izvrši plaćanje svog pripadajućeg dijela vanjskog duga iz člana 31. ovog Zakona.
- (4) Za prekršaj iz stava (3) ovog člana novčanom kaznom u iznosu od 1.500 KM do 3.000 KM kaznit će se i odgovorno lice javnog preduzeća.
- (5) Novčanom kaznom u iznosu od 5.000 KM do 10.000 KM kaznit će se za prekršaj vanbudžetski korisnik, javno preduzeće, banka, mikrokreditno društvo i privredno društvo u čije ime se zadužila Federacija, kanton, grad i općina ako ne postupi u skladu sa članom 33. st. (2), (3) i (4) ovog Zakona.
- (6) Za prekršaj iz stava (5) ovog člana novčanom kaznom u iznosu od 1.500 KM do 3.000 KM kaznit će se i odgovorno lice vanbudžetskog korisnika, javnog preduzeća, banke, mikrokreditnog društva i privrednog društva.
- (7) Novčanom kaznom u iznosu od 5.000 KM do 10.000 KM kaznit će se za prekršaj vanbudžetski korisnik, javno preduzeće, banka i privredno društvo ako ne izvrši obavezu iz člana 56. stav (4) ovog Zakona.
- (8) Za prekršaj iz stava (7) ovog člana novčanom kaznom u iznosu od 1.500 KM do 3.000 KM kaznit će se i odgovorno lice vanbudžetskog korisnika, javnog preduzeća, banke i privrednog društva.

- (9) Novčanom kaznom u iznosu od 10.000 KM do 20.000 KM kaznit će se za prekršaj vanbudžetski fond ako podatke o svom dugu ne dostavi nadležnom ministarstvu finansija u skladu sa propisom iz člana 67. ovog Zakona.
- (10) Za prekršaj iz stava (9) ovog člana novčanom kaznom u iznosu od 1.500 KM do 3.000 KM kaznit će se i odgovorno lice vanbudžetskog fonda.
- (11) Novčanom kaznom u iznosu od 10.000 KM do 20.000 KM kaznit će se za prekršaj vanbudžetski korisnik ako podatke o svom dugu ne dostavi nadležnom organu u skladu sa propisom iz člana 68. ovog Zakona.
- (12) Za prekršaj iz stava (11) ovog člana novčanom kaznom u iznosu od 1.500 KM do 3.000 KM kaznit će se i odgovorno lice vanbudžetskog korisnika.
- (13) Novčanom kaznom u iznosu od 10.000 KM do 20.000 KM kaznit će se za prekršaj javna zdravstvena ustanova ako podatke o svom dugu ne dostavi nadležnom organu u skladu sa članom 69. ovog Zakona.
- (14) Za prekršaj iz stava (13) ovog člana novčanom kaznom u iznosu od 1.500 KM do 3.000 KM kaznit će se i odgovorno lice javne zdravstvene ustanove.
- (15) Novčanom kaznom u iznosu od 10.000 KM do 20.000 KM kaznit će se za prekršaj javno preduzeće ako podatke o svom dugu ne dostavi nadležnom ministarstvu finansija u skladu sa propisom iz člana 70. ovog Zakona.
- (16) Za prekršaj iz stava (15) ovog člana novčanom kaznom u iznosu od 1.500 KM do 3.000 KM kaznit će se i odgovorno lice javnog preduzeća.
- (17) Novčanom kaznom u iznosu od 10.000 KM do 20.000 KM kaznit će se za prekršaj federalni ministar finansija, ministar finansija kantona, gradonačelnik odnosno načelnik ako obaveze koje čine unutrašnji i vanjski dug ne otplaćuju u skladu sa članom 5. ovog Zakona.

## **POGLAVLJE IX. PRIJELAZNE I ZAVRŠNE ODREDBE**

### **Član 92.**

#### **(Rokovi za donošenje provedbenih propisa)**

- (1) Nadležni organi će u roku od 60 dana od dana stupanja na snagu ovog Zakona donijeti propise iz čl. 17. stav (5), 18. stav (4), 19. stav (4), 29. stav (3), 45. stav (1), 45. stav (2), 46. stav (3), 47. stav (1), 50., 52. stav (1), 57. stav (3), 60. stav (5), 73., 75. i 88. stav (1) koji su potrebni za provođenje ovog Zakona.
- (2) Vlada Federacije, vlade kantona, gradonačelnici i načelnici će liste iz čl. 17., 18. i 19. ovog Zakona objaviti u roku od 60 dana od dana stupanja na snagu ovog Zakona.
- (3) Započeti postupci zaduživanja i izdavanja garancija koji nisu okončani do dana stupanja na snagu ovog Zakona nastaviti će se u skladu sa odredbama ovog Zakona.

### **Član 93.**

#### **(Rokovi za usklađivanje propisa)**

- (1) U roku od 90 dana od dana stupanja na snagu ovog Zakona uskladiti će se sa odredbama ovog Zakona drugi zakoni i propisi koji na drugačiji način uređuju pitanja koja su predmet ovog Zakona.

(2) Vanbudžetski fond, vanbudžetski korisnik, javna zdravstvena ustanova i javno preduzeće uskladit će svoje interne akte sa odredbama ovog Zakona, u roku od 90 dana od dana stupanja na snagu ovog Zakona.

**Član 94.**  
**(Tretman konačne alokacije vanjskog duga)**

(1) Konačna alokacija vanjskog državnog duga koja je nastala prije stupanja na snagu Zakona o zaduživanju, dugu i garancijama Bosne i Hercegovine ("Službeni glasnik BiH", broj 52/05), Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, br. 86/07, 24/09, 44/10 i 30/16) i ovog Zakona važeća je i obavezujuća.

(2) Konačna alokacija vanjskog duga Federacije, kantona, općine, grada i javnog preduzeća nastala prije stupanja na snagu ovog Zakona važeća je i obavezujuća.

**Član 95**  
**(Prestanak važenja drugih propisa)**

Danom stupanja na snagu ovog Zakona prestaje da važi Zakon o dugu, zaduživanju i garancijama u Federaciji Bosne i Hercegovine („Službene novine Federacije BiH“, br. 86/07, 24/09, 44/10 i 30/16).

**Član 96.**  
**(Stupanje na snagu)**

Ovaj Zakon stupa na snagu osmog dana od dana objavljivanja u "Službenim novinama Federacije BiH", a primjenjivat će se 60 dana od dana stupanja na snagu ovog Zakona.